

景  
文  
集

一  
二











景  
文  
集

一  
二

宋  
祁  
撰



中  
華  
書  
局



景文宋公集卷第九十六

原本卷首  
二頁佚

序

春日同趙侍禁遊白兆山寺序

見聚珍本  
卷四十五

送薛嘉魚序

見聚珍本  
卷四十五

登科記序

見聚珍本  
卷四十五

送同年吳昌卿之上元序

江南地方數千里。士子風流出其間者。有吳氏昌卿十三官焉。昌卿蚤孤。事母以孝聞。務時學敏。靡天爵。爵身在江海。名動京師。天聖初元。挾策西上。歷造鉅公。暴其素蘊。倒屣握臂。一旦在諸生右。由是士類欽挹。獨映當時。時僕亦以先人牛馬走與計南闕。既忝相如之至。遂並田蘇之游。而朋儔後生往往竊借其名。以爲光寵。初。昌卿少而好賦。每私勒十題。終朝而畢。及異試之際。少選成文。欲勇者賈其餘。游刃而滿於志。俄署太常高第。調主袁之宜春簿。甫一歲。丁內難。輒去官免。服闋還臺。會縣官以拔萃之科高選英俊。昌卿卽及舍里旅。閉戶不出。而自春涉秋。言成數萬。猶介士待鼓聲而奮。博者臨蒲齒而疎。適會有司以考限斷。昌卿遂觸報罷。再佐邑於昇之上元。朝髦野質。咸爲懷歎。君方奉檄欣如。趨府稽如。成虧之間。

不槩冲氣。則細故祇悔。胡無自入焉。是行也。春江溶溶。春山蒼蒼。羣鷺鳴唳。雜花幡舞。晨征夕次。明晦萬景。足以傍三戶之牢愁。攄六朝之雜擬。古者歌詩。必類輶聲。而系之山。之陽兮。水濱。暨吳榜兮。行人。霞之朝兮。露夕。隱隄側兮。思君。愛不見兮。搔首。江浮天兮。共春。

慶曆兵錄序

見聚珍本  
卷四十五

元太守待告南陽襄葬送行序

太守元公。以絕俗之姿。邁協華之運。用鄒魯之經術。始焉簞仕。因田孟之長者。終以立名。簞胄席以聯官。剖錄符而出守。加以博練前載。淵通治體。盤螳封而不跌。舞桑林而中奇。陟降丹塗。習聞三尺之律。臨遣黜座。親奉十行之文。故公之下車也。拯頽綱。究雅俗。廉問民瘼。而豪桀不能擅私矣。視原田。正經界。督課作。而稼穡不可勝食矣。班寬大之令。民咸知於上意。削靡密之教。吏自飾於儒雅。風由上而化下。雨我公而及私。基年之間。一境不變。先是。公迫官牒之鞅掌。闕宰樹之營卜。日月其除。寒暑載離。企彼南陽之田。是有東陂之產。由是愴露霑罔極之感。圖雨裏有進之業。奉需頭而誥請。因遞傳之載馳。精懇上聞。僉晉遣降。越金素之彫節。揭風旂而首路。肅四牡以出餞。紉五鼓以戒晨。醴奠旅陳。簪紳舉集。客有奉觴於公。前而言曰。聞夫立身以明義。事君以展體。顯親以盡誠。古之道也。若公之素風冲和。瓊意完行。鳳覽德以來下。鴻漸陸而爲儀。藹藹嘉猷。式是王國。穆穆休問。賓厥帝門。則身可以謂之全矣。敏政勤化。首公勵節。

緝素絲之五絨。聚羔裘之三英。固幹事而克終。經布常而有藝。則公之事君。可以稱其至矣。赫赫閭里。結廷尉之駟。森森松檟。開京兆之阡。東方之騎。按道以千餘。西京之車。會葬者數百。有道之碑。無愧石君之孝不衰。則公之顯親。可以言其終矣。若乃東漢鬱鬱之神壤。南都麗康之雄輔。畫衣錯繡。宴褰揮金。楚老壺漿而出迎。蜀令弩蘭而前引。累茵而坐。季由之感無窮。望寺而趨。張湛之恭斯在。萃是衆美。爲龍爲光。卓哉昌辰。仰止耆德。如斯而已矣。逮夫白日馳陸。涼飈動天。騎竹之童。侯之歸鞅。熟芝之檢旌。黃霸之治功。於斯之時。然後觀其榮也。某恭梓攸託。占藉有初。庇雲蔭以居多。偃風聲而素久。粗訂輿誦。深愧不文。謹序。

相國張公聽普印听師彈琴詩序

樂家有琴也。於古差近。釋子悟禪也。在法最勝。勝法難喻。古聲難調。二者合以相資。此听師之鼓琴也。相國清河公鎮許昌之初載。師以領忘言之契。有命駕之行。問其清靖。參以宴坐。心照云舊。法樂甚歡。於是乘艾夜之閑。投蘭言之隙。思有以音聲佛事。蕭散天弢。竦神承流。深根寧極者。莫尙乎絲桐之樂。乃進而御之。既一再行。相國洒然而喜。顧謂四坐曰。夫聲緣器至。器乃假合。和寓聲現。聲本虛空。若夫据大和以親琴。琴也。特朽株枯木。自解脫而論法法也。皆駛月行舟。道要盡然。吾聽止矣。因爲詩以貺師。其亂章有彈意忘琴之句。所以逗機爐雪。遁迹魚筌。彷彿大方。脗合真際。師亦躊躇滿志。推琴而視之。它日予與觀。

焉。竊美公以左槐直宰，回入佛乘，徑登之如此。又嘉師以安弦軟音，動蕩天倪，造適之如彼，是用敍作者之意以冠其篇云。太常博士直史館廣平宋某。

淮海叢編集序

詩爲天地縕，予常意藏混茫中，若有區所，人之才者，能往取之，取多者名無窮，少者自高一世，顧力至不至爾。然造物者吝之，其取之無限，則輒窮躋其命而拂戾所爲，予略記其近者：王摩詰顛於盜，愁苦僅脫死，杜子美客巴蜀，入沅湘，寒飢不自存，李太白踣於貶，白樂天偃蹇不得志，五十餘分司，元微之爲衆排迕，終身恨望，劉夢得流擯抵老，弗見容，是皆章章信驗也。惟山林方外之人，亟索亟用，天不能扼其數，以無求於世，與道彷彿者，耶？予友梵才吉公，其人歟？公資能詩，始來京師，以高言警章與士大夫相酬謝，士大夫爭從之游，名徹天子，故錫命服，師號，師亦以寵爲侈，遂以南方，菴天台，凡三十年，年愈高，學愈精，自瀾東西，山溪鳥魚，草木風雲，人事法集，靈所怪區，一物一興，瞻公之思，不能給而告疲焉，可謂取其蘊多矣。公又挾惠力自在，天果不能扼之乎？故前後所著，踰千篇，分目數集，所謂淮海雙編，其第三集也，屬予以敍，公之得誦人口，貴人紙者，固多，不待僕贊，旣顯矣。雖然，願一言焉：公之徒若有辯如淨名者，或呵公以外學自鄣，公云何而默其呵，使予釋然云。

送承制劉兼濟知原州詩序

前年党項羌叛。乃今正月。穿當路塞。刼餘種將十餘萬騎。犯高奴。入金明。於時侍中劉公提卒不萬人。徑薄賊壘。鏖鋒苦戰。所殺過當。虜勢蹙。欲引去。會小吏不肖。引師擅還。賊乘我虛。侍中伏節而殞。朝廷赫然憤惋。寇之味惻然。憫師臣之亡。錄孤厥冊。哀顯存歿。仲弟寶臣自涇竿戍召入。問破賊方略。寶臣頓首雪泣。願得自當一隊。腦王庭。張天聲。以復家仇。帝偉之。卽詔以二千石守朝那。給上臺千兵。光龍帳下。寶臣邊事甚悉。出入凡三對。論兵數十章。鋪陳切慤。多得要領。上未嘗不稱善。而寶臣亦自以感遇不世。故忼慨而誦言之。既六月。引軍而西。諸公嘉其行。長言以餞。又俾僕序。所以必類之意。以寶臣之才之傑。奉廟筭。據憤謀。與羣帥協力。而侍中之靈。又且相予。彼先零百年餘運。何懼不克邪。月捷三馳。賦詩者之志也。凡若干篇。列如左方。

### 崇祀錄序

臣聞。遂古之初。民神不雜。雖有所報。未稱禮文。及夫黃軒之接萬靈。姚虞之類上帝。南正火正。述乎世官之常。祭義祭統。表乎諸儒之論。國之大事。粦然著矣。其後馬遷之書封禪。班固之志郊祀。多儀浸講。前載益詳。施及歷朝。更相祖襲。是以歲禱冬饗。祠官之領可求。經入咳數。天子之奉逾廣。蓋有道則監之在德。叔世則狎而不鑄。有唐之衰。五代無象。嘉生湮鬱。祀族僭差。極乎亂階。啓我亨會。於赫太祖。以甚武戡難。擁監觀之呪。饗帝是皇。思文太宗。以明德保邦。謹馨香之治。制神不瀆。聖上纂大維烈。重離有光。寶妙道。

之儉慈。域庶物於仁壽。忠厚躋格。殊尤殫隱。由是東緘瓊礪。除道仙閭。右瘞鼎雒。敲景雲極。帝命攸式。天載寶通。揭盛典以垂榮。亘淳烈而長世。臣比在冗局。頗志舊章。伏念三聖相承。五紀而遠。文物增損。百度之品。蓋多。詔符襍積。一王之範。當考。且開元之代。既爲通禮。而韋公肅續。讓禮闈新儀。王涇又爲郊祀錄。補備其事。國朝惟有開寶之禮。無它譏述。誠恐官成。抗守。年所屢更。青紫失傳。尊俎潛越。願褒王制。嗣祀信書。亟蒙開可。俾加論緝。又詔戶部郎中知制誥臣李維。太常博士直史館臣姜嶼。參相典領。未遑卒業。自屬爲邦。繼以二臣兼總。它職畏官之曠。編削淹期。蕪札雖存。羣條靡立。逮茲閑外。始復講求。於是興建隆之元。據開寶之舊。先列凡例。明常制也。次張題部。俾從類也。篇有引述。原乎大本。取徑要而易知。注有援證。包乎先代。務亂縷而曲暢。至於太僕之牢具。司農之蔬腍。光祿之脯果醪醢。少府之器服圭品。奉常之粢稻。太府之薰幣。將作燧鑑之給。司天日時之告。祝史冊信。撰工樂章。壇墀以坡級爲差。攢題以位置相準。因事示法。附義生文。比次有倫。擗撫無間。具實錄之體。固靡尙華采。備有司之傳。故自成新制。輒緣崇祀。以冠書名。析而第之。爲二十卷。有以知金玉制定之當。黼冕致美之虔。多物與稽。能事云畢。周禮盡在。無待太史之觀。漢儀可推。當留博士之藏。臣衰茶有素。紬繹罕工。絕筆冒聞。魂爽震越。謹上。



# 景文宋公集卷第九十七

## 序

江上宴集序

見聚珍本卷四十五

宋同年劒池編序

見聚珍本卷四十五

王參預詩後序

扶風馬蘓仲康與伯氏張建維自弁髦之齡篤常跗之愛業成門內名動京廩當時聞人多與游處咸平癸卯歲嘗奉世父官於越絕會今參豫清源公以危言大對克厭上心擢佐著作郎宰邑定海士流斬嚮號登龍門時仲康弟兄雅欽公名悉索素蘊振褒衣脩矩步以士相見之禮願知於公公一覽其文厚爲嗟挹亟作詩一百四十言自題烏欄以遺之勗其大成許以遠到陽秋一字蓋重褒衣之褒機雲二賢遂結錦囊之願其後建維以真宗上封之七年由進士第歷曲臺終博士仲康以今上初元之二年繼升奏籍相望雲漢穆如墳廡信夫東國人倫之不誣高陽才子之無隕者已仲康銜玉音之賜閱鈞婉之蹤且念巾箱久藏雖五經之均愛懷袖勤玩虞三歲而或滅非就山珉之刻易訂家檀之傳謂僕比牒同邦丐辭裁序因歎博士君未終公惠而無祿早世安昌入相罔竝卮酒之歎子夏言詩姑誌師門之舊勉述顛

未附之左方。

南陽趙叔靈集序見聚珍本卷四十五

送英州理掾詩序

沛國十四舅再調爲英州理掾。過辭於子。客有惜其去者。私於坐曰。子嘗言舅家之才之邵。可爲國華代寶。今縱未能疏高爵。激卬萬乘之君。猶當爲三輔高選。奚以之萬里而南爲。予曰。夫所謂德全者。得喪喜慍。未始入乎胸中。彼宴安腊毒。皆囿於物者也。今夫秦山之雲。卷之在膚寸。舒之徧天下。和氏之玉。始之爲廟器。捨之倫砮硃。當膚寸與硃砮。若怒且呼曰。我必徧天下。爲廟器。人方以爲不祥且怪也。之人也。之德也。寧容以道里遠近。祿稟薄厚。繫然以自辯哉。是其爲德也全矣。姑見夫辨嚴在且臺閣諸公。皆賦詩申贈。以見鄭志行矣。南方寬柔。獄無留事。數擊鮮進醇酒。休日則陟神區。探奇絕。彷彿洋乎天倪之地。以放外物之累。寧不綽綽有裕哉。客曰。善。宜以序明日遂行。

送賢上人歸山序見聚珍本卷四十五

送張端公轉運兩浙序見聚珍本卷四十五

送張都官知兗州序見聚珍本卷四十五

送刁君績赴蘓臺序見聚珍本卷四十五

張相公御賜飛白書并進歌答詔刻石序

慶曆二年秋八月。皇帝御飛白書千歲二字。賜大傅鄧國公。公既下拜登受。卽進歌一章。發舒懿藻。列榮遇之懇。翌日有詔。所以褒答甚厚。公欲修上賜。夸代珍。乃索完青。以醵以鑄。披天俸采。與辭偕永。又俾恩題序歌右。庶得其詳。恭惟神筆之況。有似重師臣而光悼策歟。夫千歲者。延紀之盛期。爲壽之極言。雖老彭之養。聃史之隱。未有過焉者也。且賢人之生。率五百歲。謂之命世。及默契筌宰。咸會天人。則一遇之罕。謂之嘉會。皇意若曰。公由青宮調護之舊。身翊飛龍。手披叢雲。三爲大丞相。劬勞王室。年艾功成。以安車就第。奮斂謀謨。完爲大和。扶輿陰陽。回入難老。故因所遇之運。而以其數錫公。進陪命世。超十期頤。惟公饗之。實帝命之。昔史克之頌僖公也。其輯曰。萬有千歲。眉壽無有害。口陋藩涼德。空言不情。猶適鐸採焉。託于聲詩。寧若自天子所。發爲褒祝。日珥爛乎家楹。星鈎灑於毫端。從古以來。龍遇始終。未有二公者矣。至於容姿攸縱。聖蹟冥符。則具素聞。知狀足於詠嘆。此不申頌云。



# 景文宋公集卷第九十八

## 說錄題述

鴈奴後說見聚珍本卷四十八

舞熊說見聚珍本卷四十八

酺說見聚珍本卷四十八

## 字說

高祖紀七年春。令郎中有罪耐以上請之。應劭注曰。輕罪不至於髡。完其髡髮。故曰耐。古耐字從彡。髡膚之意也。杜林以爲法度之字皆從寸。後改如是。耐音若能。如淳曰。耐猶任也。任其事也。師古曰。依應說。耐當音而。如說則音乃代反。其義兩通。耐謂頰旁毛也。彡。毛髮貌。予以顏氏之說。似不審應音。及誤引許慎說文。不了其義。更有兩通之語。且耐無而音。止於乃代一音耳。案古者能字皆作耐字。亦取堪任其事之意。後世以彡三足之能爲能。故今人書能無有作耐字者。應云耐音若能。此能彡乃是三足能之能。能耐自然聲近矣。本不爲而音也。顏氏云而謂頰旁毛。案說文自訓而字爲頰毛耳。象毛之形。至耐字。直釋云罪不至髡。則顏氏謬應意而誤說文。其失明矣。

王杲卿字說見聚珍本卷四十八

錄田父語

歲維孟冬。京縣大穰。戶旣還定。鄉無捐瘠。室家漶漶。厥聲載路。於是先生命從者具柴穀。適野而觀之。汁者滿籜。稻者如茨。饁者弗仇餉。鋤者無德色。糴不閉隣。輸不爭承。欣欣然以盡四友之敏。先生乃揖田父進而勞之曰。丈人甚苦暴露。勤且至矣。雖然。有秋之時。少則百困。大則萬箱。或者其天幸然。其帝力然。田父俯而笑。仰而應曰。何言之鄙也。子未知農事矣。夫春膏之烝。夏陽之暴。我且踣跂竭作。楊芟梓中。以趨天澤。秋氣含收。冬物蓋藏。我又州處不遷。亟屋除田。以復地力。今日之稷。自我得之。胡幸而天也。且我俯有拾。仰有取。合鋤以時。衰征以期。阜乎財求。明乎實利。吏不能奪吾時。官不能暴吾餘。今日樂之。自我享之。胡力而帝也。吾春秋高。閱天下事多矣。未始見不昏作而邀天幸。不強勉以希帝力也。遂去不顧。先生引車而歸。從者曰。夫子何讓也。我直彼曲。請得還辨之。先生曰。不可。淺丈夫悻悻然盜天功以私己力。乃自記之矣。奚獨父之誅焉。

壽州西園重修諸亭錄

州治下蔡八十載。天守牙居。惟有黃堂便坐。與吏民賓客相見。無它觀游。庸息我私。前人或指是爲傳舍。不一二歲且去矣。亟我勞而遣人逸乎。訖不肯營。予友集賢王君子野。以景祐三年始來領州。陋前之爲。

不藏其言。乃取四偏隙地。袤三百弓。治而園之。破廩場。蕩池區。剗蕪蒞榛。百板以興。岷然而高。於眺望宜。則以爲亭。輿然而幽。於息偃宜。則以爲堂。析置八區。疊棘相望。不決沼沚。平䟽圃畦。射焉有棚。庇焉有樾。取材於官。役不逮民。春秋以展地主之勤。歲月以休公家之勞。禮成事時。身有餘佚。州人駭觀。嘆美一辭。自是署制劇雄。它邦不若矣。當此時。子野以治績聞。號爲異等。由是觀之。繕葺燕居。果不害於爲政。政之不立。雖有廷內。尙惡乎興。慶曆初年秋七月。予待罪于茲。距子野之遷。歲才四舍。其間凡五易守。而前之胥宇。皆土圯木撐。階塗缺殘。罅風濺雨。壓焉有漸。非來者不善繼。蓋不暇已。予也幸而暇。其明年。因得新之。壞者支。蠲者鮮。蒼者夷。汙者浚。潛奇伏妍。一日並還。庶乎子野之志。及予而大備。嗚呼。人之言。吾廩帑是力。刀筆是總。苟獲濟矣。容膝之爲多。尙何務爲是舉。不知君子之道。且先王域民也。四惟士以間宴處之。高明輪奐。各有宜適。仁義之所談。教化之所謀。體神胖王。乃能自力於之。況吏二千石。居峻制嚴。表的千里。偪而無差。如等威何。予是以見人之言。與子野之道。得失有間矣。初。子野落成。石君曼卿鑄石紀其詳。及予完復。亦用史臣之法。謹時月文。以忠告之。誼詔後來云。

西州猥藁系

西州詩今分類在此集內見聚珍本卷四十八

題司空圖詩卷末

唐司空表聖隱虞鄉之王官谷。唐亡。表聖死。無子。家書湮散。後百五十三年。直宋嘉祐歲己亥。武威段繹

得書一卷。示予曰。表聖私藁也。紙用廢漫。字正楷。凡詩十有二篇。此世所傳表聖筆。其真不疑。釋以重番。治背。槩軸錦護首。粲然若新。其勢不數百年不泯也。噫。表聖賢者也。以其賢。故一物一言。爲後人愛祕。若此。寧當時之人舉不及後人之知表聖耶。是不然。同時者媚。異時者慕。尙何怪哉。釋得於虞鄉尉孫膺。膺得于谷口民張。張傳之祖。祖嘗爲表聖主閣云。廣平宋某記。

福嚴院種杉述

見聚珍本  
卷四十八



# 景文宋公集卷第九十九

論

有若論

太史公仲尼弟子傳稱孔子既歿弟子思慕有若狀似孔子相與共立爲師他日弟子進問云云謂月離商盟年長有若默然無以應之弟子曰有若避之此非子之坐也予嘗推本其文此殆鄒魯間野人語耳若夫多能攸縱淵泉博厚與日華天極不可階而踰者此固卓然異稟理絕夷等生人以來未有如之者矣及夫天不憖遺人將安做服膺之徒悼惘無所則尊其言而奉行之可也敷其教而懋明之可也寧待索目皮之肖似席師訓以咨決握衣避席北面而事之使弟子皆愚人也則可若其少知一體寧不謂之痛心哉夫蜥蜴似龍不以御天碣砮象玉弗容禮神萍實擬日羲仲面之寓木偶焉僕夫云之何則真假有區甚愚能判狂聖殊品惟材誰強今乃遁道德之實據形髮之僞扳而立之質而逐之是先聖宜被竊玉之誅案陽虎竊寶玉大弓仲尼貌似陽虎項羽可膺降嬖之錫舜重瞳項羽亦重瞳優孟足俾相楚孟似孫叔敖也虎賁亦當佐漢虎賁狀似蔡邕魯多君子一何勃哉是使在三之義永廢於師嚴無服之喪下同於儒戲昔周思召伯猶能愛樹越求范蠡因用鑄金自假物以懷賢非望人而責實較之茲事不以優乎及觀孟子書亦云子夏子張子游以有

若似聖人欲以所事孔子事之。強曾子。曾子不可。曰。江漢以濯之。秋陽以暴之。皜皜乎。不可尙也已。由是而言。則始嘗謀之。後弗克舉。又安有離畢亡應。商瞿乏對。撤坐攘臂。事之弗終之論乎。古人多失實於傳聞。此其驗已。

和戎論

見聚珍本  
卷四十四

蕭望之論

見聚珍本  
卷四十三

# 景文宋公集卷第一百單一

## 雜文策題補詞

對太學諸生文

見聚珍本卷四十八

### 策題三道

問兵之設久矣。雖甚盛德之主。未有不養威蓄衆。以平亂略。制民謀帥。以經王事。而能保鄣萬寓。震疊四夷。乾剛雷聲。莫我之禦者也。故昔之高才上哲。謀臣猛士。度攘宄之隙。稽奇正之本。著書定策。列于家流。祖述相因。風烈如在。然考其言。則煥同蓍蔡。質于事則。或若筵楹。略舉諸凡。且會而要。蓋聞萬人之命。繫于擇將之善否。則國之安危。必取其練韜鈴之謀。敦詩書之奧。多識前載。弗由中御。乃可以克敵制勝。尊主庇民。然則絳侯少文。功高漢籍。成安大儒。身燬泚壘。去病不學古法。實破匈奴之強。趙括能讀父書。無裨長平之禍。由斯而談。則後之習孫吳祕術。曉張韓所次者。又奚益哉。至若周以卒乘而王。仁術也。秦以功首而帝。霸事也。何車戰遺法。墜而不復。爵級近賞。行之猶利。將姬公聖制。泥于遠。商君暴政。通于今邪。抑又聞之。弗教謂之弃民。居安不可忘戰。故國家內有五營七萃之衆。外有剋屯乘鄣之師。時無春秋。訓以鉦鼓。因彌縫偏伍之法。爲擊刺坐作之容。督責有程。部曲不懈。而論者復以爲平居則案圖易習。臨敵

則因事難期。今欲捨陳迹而弗由。則練兵無本。蹈前言而必用。又應變或疎。質乃武經。孰爲彝法。今當商  
輒前志。細發壯猷。總文武受任之殊。酌古今養生之便。其安也何教而善。其用也曷舉而宜。上體好問之  
心。並陳有備之戒。熟復條悉。遲薦于朝。

問。羌賊叛命。甚逆天理。揚埃穀馬。盜掠邊人。鳥鈔豬突。輕進易退。而疆場之吏。習練未明。決者貪功。懦者  
撓敵。出入五載。未有成功。遂使曾惡游魂。自謂得計。虐用部種。多罪貫盈。兵剽其頸。晏然未悟。朝廷愛重  
黎庶。不欲窮追。止遣師人。嚴護亭堡。然而餽餽之費。苦於無涯。屯戍之勞。未有云訖。衆君子講習妙略。發  
憤上言。故陛下垂詔有司。引訪參欲以申口。考長冊俾無遁謀。衆君子其定志悉心。孰復研究。且豐則足  
食。用兵之本也。請先計遺利。以佐軍興。夫茗鹺酒稅。權於縣官矣。而賈販告匱。歲課不充。今將流通轉貿。  
官司交利。如何爲法。銅錫冶鑄。化爲法錢矣。而小屋儲積。官帑爲虛。將發出滯留。變動萬貨。如何爲制。賦  
車籍馬。行師之急也。請博詢前古。以便當世。夫十萬爲率。步騎相參。今若舉而出征。則輜重駄幕。幾何而  
足。菽粟蕙稈。幾何而計。風雨暴露。何以蔽障。營壁屯置。何禁侵掠。又如坊牧閑監。畜馬以時。而官吏不肖。  
歲朶月削。昨緣乏用。賈於民間。材非閑估。類不堪戰。今將蕃牧奏隴。按求唐法。則慮爲虜侵。宇畜鄉亭。遵  
用漢制。則未救時乏。並陳長利。無諱攸司。至於兵家之書。久應論計。地有九種。悉載等差之名。陣有八法。  
各陳施設之要。能悅禮樂者。旣稱謀帥。不學孫吳者。亦自立功。兩端異焉。并爲詳確。遲聞該洽。升薦諸廟。

問大事在戎。常德立武。安天下者。固不可以忘戰。言聖人者。非得已而用兵。是以咨之輿論。擇之多筭。伐謀制勝。經武定功。今諸生章騰公車。身待南闕。講聞方略之日舊矣。上使有司廷試。問所欲言。固當怛臆。感槩。條陳科別。勿并勿遽。明著于篇。國朝軍制。近沿五代。外籍廂校。內列禁屯。無歲不踐於更。無日不討於教。指麾部分。可謂素辨。然或臨機逗撓。違律否臧。且罪隸刑徒。漢驅以鬪。賈人贅婿。秦悉備行。未始選鋒。悉能破敵。永惟其事。頗用致疑。何彼之不教而勝歟。吾之豫訓而負歟。周魏府兵。號爲有法。隋唐並用。課效甚明。今欲求六馱之舊章。倣八柱而參師。詳言舊制。折衷新規。夫策待應機。軍不中御。而曹氏署教。逆料合淝之攻。宋祖封函。直禽外水之戍。盡去陣法。反敗逢頭之師。追復車戰。更詒陳濤之屐。法與事戾。一何遠邪。且如觸往亡之凶。何城實克。犯甲子之忌。何主實興。折麾沈水。雖卽破奔。飲酒變血。孰應擒馘。日辰弗驗。刑德奈何。至於聽同律之聲。若爲取驗。驅熊羆以陣。胡法使然。駐隊鋒隊。進退之所宜。圓陣方陣。施設之安在。四機行軍之要。十利用騎之能。夷吾三官。必將備物。晁錯六地。各有使兵。承天之邊要。奚先。王昶之治略。疇急。欽遲良誨。升薦諸朝。

補監生牒詞

國家崇飭儒黌。招徠國胄。厥脩典學。俾趣大成。屬當著錄之辰。茂謹程能之式。備觀廣業。咸序俊名。噫。申錫百朋。旣善循於聖域。賓興三物。將大對於王庭。盍各良圖。以副褒然之舉也。

補進士李孝嗣充州學講書詞

夫子之意藏於經儒先生探出之以授學者使後世懷懷如古聖親炙于前講習之益大哉向學徒言於刺史以君深窮典籍雖白首不衰願爲諸生譚思博喻俾嚼厥味而升諸堂君其無辭宜補州學講書故牒。

補鄉貢進士張景純充學錄詞

學舍庶務須雅才領錄之君向已總攝會與計吏偕故虛席不補今君之才未克施有政宜還學官振綱條觀所措置是亦爲政云宜補州學學錄故牒。

補鄉貢進士趙肅充州學教授詞

士之入學至大成必因夙儒碩生引而內諸聖賢之域以君博物多識求文章法度今肄業之彥褒然朋來君當示以規模棖闌拂所蒙而先明之得英材教育孟軻所樂也刺史慕焉今補君州學教授。

補鄉貢進士劉傑充堂長詞

前日以堂長在學錄右主者言學錄錄一學事堂長爲諸生首位當在次孔子曰必也正名刺史是以曉有司釐正今補君州學堂長其率諸生典學無忽故牒。

# 景文宋公集卷第一百單二

## 齋醮文

### 乾元節宰相開啓道場齋文

伏以若水開祥。契上聖千年之運。祇園脩供。資能仁衆善之因。悲憑無量之福田。仰祝延鴻之睿筭。伏惟  
皇帝陛下。體元行健。累洽重熙。荷靈命之瞻懷。迪先謨之懿鑠。昭德而誕膺純錫。敷文而交舉上儀。在璿  
克集於歲功。鳴社爰臨於誕節。萬邦咸乂。九序惟歌。某官翊亮天工。協宣皇極。率勵同寅之志。克申順美  
之誠。當華渚之令辰。獻堯封之善祝。躬趨寶剎。特啟淨筵。四事香花。羅寶階於兜率。六時鍾唄。演梵唱於  
魚山。繫勝果之圓成。佑鴻基於悠久。皇帝伏願宸居樂豫。壽域歡康。固守位於金輪。齊卜年於沙劫。法雲  
溥蔭。將德澤以長周。慧日揚輝。等皇明而久照。某官伏願茂膺戩福。益顯嘉庸。彌宣調鼎之勳。上贊垂裳  
之治。然後願寵均朝著。恩浸寰區。官師咸罄於忠規。黎獻並躋於富庶。大包瀛表。細及昆跂。仰沐加特。同  
茲饒益。

### 罷散道場齋文

伏以薰風叶序。寶月向盈。記祥虹華協之期。著金鑑露囊之盛。虔趨福地。大啓眞筵。罄朝野之歡忻。集人

天之瑞福。恭以皇帝陛下。茂膺瑞命。祇紹凝圖。待旦垂裳。冒洪禧於海域。彌旬舞羽。偃師節於方陲。順履佳辰。夙標聖旦。旅賁琛而展慶。鄰錄玉以伸歡。某官襄贊大猷。翊宣至化。欣誕彌之佳節。集延祝於羣倫。哀對梵仙。宣揚祕典。光闡佛乘之最。上迎天筭之遐。皇帝伏願。湯德逾新。堯章增煥。九河開與。五緯循躔。綿周億載之期。長奉萬年之慶。鋪昭惠命。永庇含生。某官伏願。穆景三階。凝和九鼎。竝翊帝猷之亮。交隆國棟之華。然後願鳴玉翠蕤。藹藹贊清寧之運。游童逸老。熙熙樂仁壽之場。

乾元節功德疏右語三首

右。伏以星樞燦電。仰屬聖期。龍藏貫花。普陳淨供。演迦陵之仙韻。籲震旦之歡心。伏願陛下。齊永寶天。均華慧日。如山委脫。拂石迎年。曼丕筭以無垠。撫慶圖而增固。

右。伏以國家寶祚。縣長洪基不固。惟正陽幾望之旦。乃元后克生之辰。列辟投誠。百靈薦祉。延梵宮之開士。集淨會之良因。上奉至慈。永臻純嘏。帝圖累盛。益隆百順之祥。睿筭無疆。共罄萬年之頌。傾虔懇祝。倍萬常鈞。臣某無任。

右。伏以瑞旦流虹。茂紀清和之序。聖猷隣日。允光雍盛之期。率土胥歡。後天申祝。恭卽布金之宇。竝啓貫花之文。盛供柔嘉。清流淳濯。冀憑妙果。祇達虔誠。續惠命以無疆。擁珍圖而俾熾。永孚鴻貺。臨撫羣元。

祝聖醮文



右伏以上聖推仁萬靈蒙賜無能名德況用謝生是以祇案齋科仰祈仙極發榮晨之幽蒞步璇宿之祕網月律一周熙事云集所冀區區之懇上洛於真游丕丕之基永隆於宸祚億齡俾熾景化常新無任懇禱之至

昭憲皇后忌辰讚佛文

伏以仙駟上賓邈靈遊而遂遠星龍縣舍優遺範以如存式臨奉諱之辰欽薦無邊之祉伏惟昭憲皇后歆祥聖武宅順坤儀首基椒極之華參翊羅圖之永懿猷茂建柔化不昭悟真諦以收神衍慶謀而垂後今皇帝永懷徽則介助真詮悵先忌之環經凝孝思而叢感祓除金地披繹寶文旅華緘以巡香儼珍羞而侑供冀憑惠果上續勝緣昭憲皇后伏願法露普流慈雲周廕晏居淨界常爲十號之證明顧在朝家彌極九皇之高治今皇帝伏願奉承鴻緒增鞏丕基絕瑞高符交天人而相答尊名盛德煥日月以常新四序順成八風和布臺師假戢原稼豐甘然後願磐石英藩永茂維城之業乾台哲輔益隆讓嘏之勳官師胥叶於忠良黎獻竝躋於仁壽

禳災道場開啓齋文

圓照普臨羣生攸賴顧伉儷之屬疾歷旬月以未寧用集禪薰載披梵筴所冀滌驅衆咎叢介繁禱俾損病腦之勤回爲清淨之報投誠至切垂祐是祈

功德疏右語

右伏以法緣交濟。庶彙蒙成。方內闡之纏痾。匪至慈而曷禱。式延淨侶。敷叩靈篇。冀緣懺謝之勤。併釋咎殃之惱。諸方回鑒。萬倍迎休。祈仰所兼。祇肅于是。

禳謝醮文

臣於慶曆八年。被命案視商胡決河。於時將議脩塞。財用未辨。民無聊生。臣恐智慮昏愚。不克集事。默發心誓。仰叩上真。願開發所見。冀無迷謬。其年遂建議罷脩河口。休息兵民。朝廷頗以爲便。免於罪悔。神實佑之。今謹脩薄具。歸謝靈造。冀臣自今以往。凡百所爲。每賜警寤。無陷非僻。無墜咎辜。無謬正作。回無迷禍。爲福。敢因報祀。兼達至誠。

祈雨醮文

比以蒙常示咎。政失有初。虛取怨在人。或移災於歲。內省云屢。遠復逾非。用款藥都之庭。恭展霽網之式。晝御三復。熙事具成。願除貪墜之災。且被帑塵之晦。順氣來應。嘉澍滂流。蠹螫弗生。札瘥咸弭。惟彼蒼之垂鑒。顧自孽之難逃。叢譴尸臣。回祐黎庶。至誠馨列。真庇是依。

知益州醮文

臣荷天子眷委。臨撫西人。立功賦事。多所不逮。慮索智窮。日負罪尤。永惟巴益之地。生聚百萬。臣爲之長。

脫一繆悠。民受厥愆。今者上啓天帝高真列聖。垂監下臣。矜照危懇。俾發寤未通。濯祓暗冥。使裁處寡悔。措置時當。上不諉朝廷之法。下得遂黎庶所宜。嚮方遠罪。實天之貺。

生日設醮文三首

臣蒙朝廷任使。提總九州。安撫兵農。使各就厥緒。雖日夜極慮。期副帝心。然恐智昏識淺。差失輕重。不適事中。上詒國羞。下取民怨。故因始生之日。祇禱神靈。懺謝曩愆。開發後悟。薄品澄酌。仰薦至誠。昭鑒在下。惟賜裁許。臣遭遇盛世。名位過分。惟始生之日。上懷考妣。劬勞無報。投誠天晨。開佑餘福。焜照幽冥。超悟上真。俾臣悉力。得免罪悔。無任懇禱之至。

恭以至仁臨下。幽感必通。臣永惟所生。不克攸報。流光環及。危懇無歸。是用案式清場。投誠妙蔭。冀聖真之臨鑒。察怙恃之長違。紛委餘禱。茂延先烈。明威在上。敷訴云依。

伏以塵界喧卑。人靈紛沉。或時屯日厄。或鬼觸祟纏。或違攝取痾。或妄動成悔。沴氣相輔。私居不寧。仰惟丕覆之仁。下布無垠之蔭。敢持丹苦。祇叩高真。願垂營護之慈。俯濟危疑之困。振除後害。涵泳餘祥。颺歛可通。誠明茲聲。

祈福醮文

伏聞庶品每生。有爲皆罪。至慈無上。自新者容。敢據斯言。昧陳危亦。伏以臣本乏材力。過冒寵名。人侍禁

嚴出領藩劇。多歷年所。未報國恩。而智慮昏蒙。舉措違選。刑罰弗中。賦斂失期。感害至和。自取幽罰。遂致疾苦。綿跨歲時。祝不信辭。鬼用牧室。撫心內省。詒咎有初。今者祇潔清場。廣延上士。披拂琅蘊。申啓珠篇。備舉明科。祇除餘責。臣今願洗濯情府。茂對聖真。已造之非。從而知悔。將來之殆。決不再爲。少禳降癘之來。仰幸添齡之貺。披宣至苦。監照是依。臣稟生暗愚。少小多病。十有三歲。慈母見損。年甫及冠。又失父蔭。訓誨弗終。志操晚立。行年二十有七。乃始登科。片文單伎。遇天子十有六載。擢爲從臣。或外領劇州。或內幹繁局。邊要帥領。皆責便宜。每念短謀謬計。弗暢人事。輕重失措。處置乖方。下情壅隔。庶務漏罅。貪榮冒祿。苟進偷安。雖逃邦刑。先罹鬼責。抱疚沉頓。出入三年。寒暑交侵。藥石無效。誠恐值乃厄會。不復永年。內求諸心。敢不知罪。向者預編條敕。兼領史書。情淺意迂。斟酌無準。識昏學陋。褒貶妄加。幽明難誣。報應俄至。又如獄案繁重。軍律峻嚴。從權作法。臨機制變。纖微有失。生死頓乖。及茲追咎。慘如焚灼。伏念訓有改過。法容自新。況惟高真。必許悔謝。若乃命曆素定。安敢有所。至於生理未終。則將自誓。已往之咎。訖靡再造。未來之惡。罔或輒萌。履于有常。戢其過分。見寵思辱。在安念危。損怨鋤驕。踐言慎獨。不敗人成。己不掩短。現長捨五欲濁緣。去六塵妄念。漸臻寡過。以贖曩愆。明神在前。慈衛如咫。有渝茲戒。是殛是顛。崇降大厲。有如皎日。無任懇禱之至。

# 景文宋公集卷第一百單七

## 行狀

馮侍講行狀

見聚珍本卷六十二

孫僕射行狀

見聚珍本卷六十一

石少師行狀

見聚珍本卷六十一

姜副樞行狀

姜遵字從式年六十八公之先本齊姓漢以豪桀徙天水後葉復貫淄右今爲郡人焉公幼岐嶷長而沈毅初肄儒業治百家之言深博自將文藻足用旣與鄉物有聲於齊魯間屢挾策于宗司以經濟自任咸平三年眞宗始御軒陛延髦秀公以進士擢第於殿庭明年補登州蓬萊尉治有風力郡將供備庫使水丘隆貪其幹用奏請就補本州理曹掾且參軍事朝廷報可未幾丁內艱去官免憂闋都銓舉充開封府右軍巡院判官京穀浩穰獄市居天下劇爲吏者罕能以課自脫公至則勵辭氣探情僞厥職脩舉庭無留事二囚自誣棄市罪獄將具矣公微得冤狀翻其文致先是雪冤有賞公慮傷前主者寢不自列祥符初秩滿判大理寺丞建封恩例改殿中丞出知吉州廬陵縣氓籍數萬氣俗荒獷左言閔貌以久訟爲健

公威克明斷。摧破姦黨。據案一決。吏民厭伏。汾陽禮畢。就改太常博士。得代歸闕。時前丞相天官正公在。西掖熟公治行。卽薦公才幹。抨察視之。任有詔。換監察御史。八年。以勞遷殿中侍御史。充開封府判官。賜五品服。吉州守高惠連誣構公。廬陵舊事。奏請逮訊。公聞命不疚。馳往對辨。左驗明白。訖無污穢。還臺。以□□同判延安郡。天禧三年。召還。遷侍御史。判三司戶部旬院。俄出爲陝梓利夔等路體量安撫。先時公舉奏山東大姓姦利事。至是。皆伏法。天子以公建白有狀。未復命。卽拜尙書工部郎中。非常例也。使還。出知邢州。今上卽位。就轉刑部。移守於滑。俄充東南轉運使。天聖元年。換京西路。不旬日。召以本官兼侍御史。知雜事。加賜金紫。受詔。詳錄計省逋負之籍。科別蠲貸。明年。遂以本官充三司戶部副使。三年。改兵部郎中。遂歷副度支鹽鐵二使務。俄攝太僕卿。充北朝正旦國信使。四年。還節。領職如故。其冬。拜右諫議大夫。知永興軍。六年春。駙召以本官充樞密副使。七年。遷給事中。八年秋。感疾。請告。兩宮馳親使。挾太醫相望於道。存神省慮。形於慰勉。九月乙丑。車駕親視臥內。賜白金三千兩。丙寅。薨於某坊第之正寢。上聞震悼。復趣駕臨弔。制贈尙書吏部侍郎。法賻所須。率在優等。夫人路氏。國子博士從古之女。封平陽郡夫人。公三子。長曰居正。舉進士。早夭。次曰延齡。任太常寺太祝。次曰餘慶。未仕。四女。長適棣州商河縣主簿王翔。次適東頭供奉官閣門祇候宿若虛。次天於室。季尙幼。孫三人。曰承顏。試將作監主簿。曰正顏。齊顏。及遺奏之上。延齡改大理評事。餘慶特授太常寺奉禮郎。正顏齊顏竝授祕書省校書郎。外孫宿拱之。授三

班奉職。哀榮之數。存歿之恩。篤矣。公長昆昭範。治春秋經。未中第。次昆著。以公貴。載授太子中舍致仕。今皆物故。公天資方重。內孝而外嚴。家庭之間。有若官府。性長於吏事。濟之以忠力。未嘗阿邑當世。故所莅必震肅。所言多指切。前後進用。皆上所自知。又以感昔人削藁納誨之箴。問樹漏言之誠。故閤臺奏議。樞機密言。天下事甚衆。世莫得而知云。惜乎。參基命之司。歲律未幾。遠猷熙綽。弗克究公之素。寒暑興沴。棟梁其萎。然可謂雄峻之寶臣。黃中之元吉者已。節惠易名。國有彛典。謹次官閥。告于有司。謹狀。





景文宋公集卷第一百十八

原本卷首  
三頁佚

啟狀

代王相公

漢風隆洽。宗臣遂萬物之宜。晉道宣臻。綿萬無窮人之諺。蓋所以恢明職業。暉潤典彝。俾百度以惟貞。靡一夫之不獲。然後翊巖廊之景化。贊法座之鴻樞。寅亮懿綱。緝熙禮嘏。撫辰凝績。冠茂伐於人彝。宅揆奮庸。飛淑聲於帝載。永言休範。宜屬洪鈞。恭惟某官。日域靈輝。天球瑞質。粹儀霞舉。會銓宰之昌期。偉景淵淳。稟天人之先覺。夙蹈凝嚴之地。亟推渥綬之私。建竝議以朝熙。舒懿文而麗國。論思東序。先賈誼以受釐。間宴西清。化倪寬之上壽。自邇彌綸庶務。叶贊宗工。潤綠詔之溫純。參黃扉之宥密。出驅元乘。慕談笑而却軍。入奏青規。用春秋而繩下。茂勳舉集。景昃荐隆。旋以國家上聖凝圖。虛皇委覽。紫清之誨。延密論於真官。綠錯之文。委鴻禧於命曆。浸尋墜典。茂建宏猷。追上世之登閔。講鴻儀於希闊。天壇祕牒。檢玉以升。中汾曲隆。雖瘞繒而報厚。申明絕業。祇答上靈。矧復整仙輶。以時巡。款屬壇而順拜。鬱華之館。緬想於道真。藝祖之區。誕頒於侯度。宣恩羨溢。紀瑞殊尤。乃至真馭下臨。聖衷登格。珠官寶地。嚴螭護之珍祠。琅簡雲章。薦麗鴻之丕構。並繫碩畫。交展綈儀。至於約鳥策之舊章。紬鴻都之祕記。搜遺冢壁。大備於討論。

增絢緹紉。動臻於良直。裁成大典。昭示方來。以至按瑞謀之著明。測祥源之鳥奕。上窮真系。憬集珍文。賁紫宙之奧符。紀翠嬌之元命。再刊青簡。分祕殊庭。斯並發自訐謏。騰爲穆頌。鏤于琬琰。充入金匏。果膺揆路之求。荐正星階之位。咸事九德。掩臯陶之矢謨。不出十年。邁樂安之故事。民瞻式係。天眷日躋。凡該動植之流。盡被陶鎔之化。竊念某忝冥有素。優仕無聞。濫巾綿纈之司。簞乏華纓之列。飲冰受命。夙畏於簡書。越俎代庖。敢踰於官守。徒以幼屬垂鴻之運。長推延世之恩。進懼食浮。中疲智効。延年斟酌。寧有合於當時。潘岳拙艱。本無裨於巧宦。泊膺明命。出掌關征。策駑筋十駕之勞。勵鉛鉛一割之用。求大夫之仁義。方冀飭躬。論文學之銅鹽。未能卒業。旋屬庭闈失養。怙恃纏悲。對風樹以長號。撫垓蘭而永想。九回結歎。慨無嗣於弓裘。十死茹辛。幸未先於犬馬。逮喪除之云畢。復譏賦而是司。權貨殖之耗登。謹簿書之出納。雖復激印單惠。訂正舊章。犯虛裝懷。盡分於節目。展體率職。無潤於脂膏。期王事之有終。誓詩人之盡瘁。然念物情素定。固并介以難移。吏道寔繁。豈萎材之可學。甫終考績。粗免曠官。効方朔以上書。徒取恢諧之誚。慕子真而乘傳。更懷孤遠之慙。重念先君侍郎。早接遊從。豫聞風義。趨平津之閣。款睥有加。託趙氏之孤緒。言多在。遽遭淪裔。上惻鴻私。俾餘搆之未墮。實休光而是賴。而又質方遠願。祿靡代耕。素衣已化於京塵。雪履將穿於車府。先疇遷貿。曾無平子之田。最質支離。屢緩休文之帶。苟媒銜自逃於醜行。則再三奚決於蒙亨。伏望某官鄒律融春。傳川借潤。辨頑金之自躍。許蟠木之先容。特拯迷途。俯矜舊物。憫周

南之顧託。軫江左之流離。雖魴鱉並逃。寧虛於漢罟。而牛羊無擇。何間於齊仁。激波儻化於海淮。自卯庶求於時夜。願著靡捐之効。少酬全度之恩。過此以還。未知攸措。

### 上江提刑

嬌庭佐治。臯陶爰作宥刑。周室移風。姬旦乃求中典。皆欲財成經制。丕奉珍圖。闡熙洽之洪猷。賁清寧之景運。是以五刑之宅。期至於無刑。三刺之文。僉同於羣吏。聿垂懿範。昭著方來。而中代已還。淳風不競。作僕區之法。始自於諸侯。鑄刑鼎之書。寢興於叔世。重輕交失。抗敵乃多。無鈞金束矢之平。有絕澗游禽之刺。至乃秦脂凝密。窮十失於隆刑。漢網恢疎。約三章於愿法。飈流既異。訟革靡常。逮夫王道下衰。憲綱增縛。前律後疏。漸紊於常經。僇令敵民。罕躋於鴻化。道無終否。聖乃嗣興。國家撫五代之遺黎。開九皇之眞系。交張治具。燮定元基。刑屬三千。緬追於遐武。號居十二。永念於懿綱。適底劇之繁文。重齋居之移讞。湯羅屢祝。犯命而乃誅。堯屋載封。畫冠而知禁。然猶念綿區之至廣。愍昭憲之未孚。臨遣信臣。按行列郡。片言而折。許龔遂之便宜。露板以聞。用田仁之刺舉。導迎寬政。宣布湛恩。苟非冠績吏師。騰英朝美。攬轡負登清之志。奏刀揚書歸之聲。則何以佐山甫之將明。副重華之欽卹。定國之持獄。自以不冤。宣尼之聽民。可使無訟。永言宸睠。是屬正人。恭惟某官。日域凝華。仙莖宅粹。六世冠冕。盛南國之道風。十紀羽儀。有西京之世德。英聲煥發。懿實流聞。早推射策之功。亟奉牽絲之寵。優游上列。蹈勵凝猷。御珍駕以駿奔。翔倉

垠而上擊分麾使竹允著於循良掌籍道山載加於紬繹旋屬近臣慰薦清問疇咨定漢藉於一王歷周  
行於三署問鬼神於前席方慶受釐儼車服於私庭更旌稽古寵章彌渥嘉績荐凝瞻言全楚之區夙重  
輶軒之寄賦輿錯出法敵於誅求貨殖懋遷俗淪於脂窟果煩刀地出按簡書揚惜恤之深仁決攘爭之  
健訟奉達仙闕寅舉詔條一成允極於盡心五月旋聞於報政以至星罕弛籥霜隼霽威文無推案之煩  
銛絕投書之訴民懷格耻罷惡少之探丸吏黜舞文鞠圓扉之茂草坐清周犴欽輔禹孜弼成議緩之功  
實賴神明之化頃者邊氓入保遐障驚師密連簞竹之酋潛議萑蒲之聚怙茲綿力屢擾齊民乃至虎節  
會軍牙璋置守出奇謀於堂上視醜虜於目中尙嘯餘妖敢稽天討而復親承深詔躬督銳師按炎微之  
舊封塞壺頭之險道戈舡狎至雀杏相望羊祜輕裘不廢總戎之事馮唐尺籍雅更持節之勞褰旗未暇  
於窮追具沐已聞於相吊收鼓銅於略越浮寶無遺駕灰乘於零陵前茅載肅克震裊牙之銳式封鯨觀  
之誅七旬咸格於藁街五刃竝囊於師節集成茂伐皆屬全謀果膺進律之恩特舉疇庸之典銘功隆碣  
方震於天聲列象哀鳥再光於郎位便合速揚上笏丕迪清衷豫密勿之鴻樞注凝嚴之景昃出參法從  
陪翠帽之宸遊入直周廬佩紫荷之仙囊然後賡奚作頌佐稷陳謨克揚英茂之文欽奉都兪之對永言  
茂躅方啓亨衢敢因慕義之辰罄敍由衷之懇切念某材非楚有士愧燕奇偶游泳於太和遂寢尋於秀  
業青衿學校幼參方領之游黃卷聖賢長豫冠章之列猥屬書同之運不忘時術之功外愧育材中疲燥

吻。轅生抗辯。遏逃城旦之書。嚴幹談經。終謝太官之傳。勵精雖切。底滯居多。加以扣寂冥襟。希光俊域。漱九流之芳潤。擧三代之英蕤。得於紉繆之餘。致在緹油之末。問劉棻之奇字。靡憚咨詢。持丁廌之小文。方求潤飾。十日敢矜於特氣。三年偶遂於變儒。不意天難匪誑。靈根夙殞。陽橋陰梓。永悼於清暉。遠壑隆墀。再充於浩歎。憤百身而莫贖。濱九死以奚追。驟歷炎涼。偶存食息。撫心自惋。非游吉之亢宗。投袂失圖。僅馮生之齋志。矧今翹英命秀。跼弛興廉。簞多士於金華。濬洪源於璧水。場駒交繫。丘帛旅馳。雖天網大該。盡收於絕足。而義車亭午。莫照於幽盆。蓋舛運之所纏。致青雲而坐隔。播精寡効。空謝於支離。列地無成。自傷於汧澥。載念道將時背。才與願違。采榮而瑜未掩瑕。務進而尋將枉尺。執中黃之賤虎。志極固窮。貫梁市之枯魚。感深遐慨。顧惟塞薄。深懼淪胥。此者幸遇某官。恢誕素功。鎮寧雅俗。敷文華而飾吏。用敦厚以變風。比闕里之訓人。不忘吾黨。類何侯之按部。先見諸生。某是敢望履祈通。游藩俟進。示壺丘之天壤。雖有悻心。宗郭泰之龜龍。寧忘素志。儻或俯矜叢品。許觀令儀。念完士之一言。采詩人之下體。陽秋借譽。俾陳蔡之及門。月旦□評。許老韓而同傳。稍遂蒙亨之志。誓銘征吉之恩。過此以還。未知攸措。

代回呂相公

顯膺朝冊。入冠台司。定命前頒。至公肯慶。恭以某官稟天正氣。蹈道至和。親逢聖真。翊贊皇極。九德咸事。六府交脩。亟辭衡鉉之崇。迭倚翰垣之重。辰階有埒。公袞實歸。建三人以調元。固萬樞而思乂。讓誠雖確。

褒制終行。卽鴟閣之便辰。煥槐庭之盛禮。良哉嗣唱。具爾均瞻。尙敦禮於朝風。且移書於宰屬。永言下綴。方庇洪鈞。慶論道之云初。佩敷言之彌緝。欣悚感緒。并猥于茲。

回宮師呂相公

荐拜靈封。懇歸藩政。安車得請。懋冊延褒。志遁成功。誼光逸老。伏惟某官行爲民表。器適時中。歷事三朝。勤勞一德。公槐弼務。聯周宰之懿猷。仙菊侑餐。訂漢台之難老。嚮總鉉旄之重。聊藉翰垣之行。日竚公歸。共熙天載。而素懷知止。確奏引年。激世教之競浮。重宸襟之嘉挹。特申冲請。用獎宗工。冠品官朝。燕居京輔。揮金娛日。匪直二疏之榮。束帶會朝。仍亞三公之著。永言茂躅。足煥常均。某夙庇挺鎔。欽懷耆艾。第結冥鴻之慕。莫奉赤松之游。猥辱謙懷。先貽榮問。仰緒風而增悅。銜至誨以忘劬。瞻愧歡翹。萬一無喻。

回大名李相公

見聚珍本  
卷五十五

回夏樞密

光奉制恩。復聯機政。僉俞惟允。欣慰斯符。伏惟某官基德溫恭。經謀隱濟。聖期參遴。宥命實司。嚮憤諸戎之騷。自請中軍之總。由陝而右。盡護將屯。持旄以西。躬授方略。屬邊防之如律。旦宸眷以竚咨。亟走召車。俾歸使節。又天樞之祕劇。用遂前勞。賁朝冊之光榮。蓋均舊物。尙聆謙執。未卽欽承。方露奏以讓還。并移書而敷述。矧惟定命。夙告治朝。幸廢冲懷。早祗蕃渥。感悚忤素。交戢于茲。

回狄侍郎謝轉官

茂膺方贊。外亞冬卿。賞典有光。朝言肯允。恭惟某官。參和熙采。安節踏中。世咨樹政之良。上倚告猷之穆。輟于法從。撫是价藩。徧愷悌於懷人。浹中和於僊曲。職勞騰報。增秩許留。尙蒙潤於靈波。足露華於賜冕。遽煩騰訊。敷列感懷。矧惟公爵之行。敢荷歡言之辱。姑欽謙假。冀永銘藏。

回李太尉

見聚珍本  
卷五十四

回王龍圖謝改職

奉承褒檢。改陟華聯。由漕最之比聞。實師興而有賴。架通禁籍。就總雄藩。參我武之訓嚴。尉彼都之翹治。方昭賢業。遽枉書辭。矧當熙采之辰。何損敷言之懿。載惟感緒。姑誌深悰。

夏太尉

總臨陝服。入守雍都。師錫所符。寵靈茲煥。恭以經略太尉。大猷遠業。文事武經。忠結本朝。功暴羣辟。向者。羌酋畔逸。軍瑣謹嚴。首圖舊人。出制師節。會風塵之微擾。苦部領之素分。邊奏薦聞。睿衷改制。亟換高牙之鎮。盡護西方之屯。幕府大開。屬僚參建。決千里之勝。聊假坐籌。便一切之宜。靡從中覆。望高羣帥。威懾殊隣。諒繫方叔之行。企賀營平之捷。某早膺台眷。欽覲恩章。歡素所并。費詞無喻。

回夏樞密

肅奉恩函。還參謀幄。露讓封而催請。稽寵冊以彌旬。中詔褒敦。薦紳聳竚。果緣宸眷。遂屈素懷。茂涓剛日之良。對越王休之盛。寶釘有爛。聿將麗服之華。閑馬斯材。併侑康侯之錫。折衝是賴。基宥云初。敢冀謙冲。曲詒誨翰。署行方箭。已抃於懋功。申誦書辭。益欽於悅禮。載言欣感。姑永銘藏。

回王舍人

被寵制函。聯榮禁掖。伏惟慶慰。恭以某官機神秀舉。器采詳華。自州士以丞髦。逮朝綬而籓羽。含章襲美。遂暢於四支。大對危言。實均於千牘。允升清貫。茂對聖期。向以星省須才。槐庭給簡。旅寄宅俊。入代出言。曾桑蔭之未移。粲綸辭而已屬。奏篇上御。成命遂行。蹈四戶之凝嚴。分六曹之平決。尙方染綬。聿頒安吉之衣。武郡封泥。式布溫純之檢。方欽詔德。猥辱移書。獲窺揆藻之工。兼幸判花之接。茲爲欣仰。併戢襟懷。

回安州范侍郎謝上

肅奉璽章。言馳旌馭。合符惟謹。坐閣云初。流美化以在人。雍太和而視履。華樞舊望。聊均左使之勞。細札寬恩。更厚南公之幸。敢圖謙裕。遠錫誨言。咀辭味之腴豐。泳情瀾之密渥。此爲佩戴。永誌誠悰。素箭蕭辰。黃堂暇景。益遵頤實。肯副民瞻。

回杜樞密

光膺制命。升贊樞庭。伏惟慶慰。恭以某官識略宏深。忠謀鯁亮。休有老成之德。荐階華近之聯。朝夕告猷。



濟天人之名學。紳綏倚重。蔚柱石之良材。果被僉僉。入居宥密。方露固辭之請。且敦難進之風。矧邊瑣少勤。帷籌虛佇。得賢爲賴。崇讓匪宜。諒外迫於至公。必難諧於素尚。敢期謙挹。亦示誨言。欽俟拜嘉。始符翬祝。

### 回夏宣徽

光膺茂制。改建高牙。伏惟慶慰。恭以某官亮節純深。嘉謀隱濟。比煩西略。荐筦中樞。參盟作礪之山。增重敲雲之鼎。方乃上還劇柄。懇避成功。緣石席之重違。遂輸垣之光撫。寵深易地。任切殿邦。尙聞需奏之勤。未卽齋壇之拜。并流餘誨。具述冲懷。顧成命之旣行。匪善辭之能已。埒交恩節。用慰翹衿。感戢于茲。名言罔喻。

### 回杜樞密

肅奉制函。進聯機省。協于上德。佐乃訏謨。方安節以辭隆。久稽恩而埒報。亟紆敦詔。罔遂謙懷。式涓休令之辰。茂對延登之典。便蕃三接。密勿萬樞。惟賢路之有光。固公言而交慶。尙流榮翰。敷致感辭。仰欽圖舊之良。參服降階之懿。永言悚抃。第戢襟靈。

### 回鄭樞密

顯膺中詔。參幹內樞。伏惟慶慰。恭以某官業總天常。道躋民極。育卿材而有蔚。序皇器以斯華。政緝九畿。

利鈞六筦。休有不績。簡于上心。果陞諫掖之嚴。入佐天機之重。紳綏動色。慶嘉遇之大來。帷幄竚咨。本朝言之師錫。側聆謙執。未卽寵光。伏省戶以固辭。眷宰僚而示誨。竊商眷倚。必有敦褒。望回初節之甘。速對茂恩之緝。欣銘企聳。併萃于茲。

回宋尙書

見聚珍本卷五十二

上皇子賀封建

光奉冊書。肇疏藩社。伏惟慶慰。恭以壽國公太尉狗齊異稟。岐嶷早成。席海潤之洪禧。擁日躋之休閒。先親有典。僉議亟揚。屬公府以上圖。詔治朝而備物。壹茅分土。居承列聖之華。開府秉髦。聊示中權之寵。維城斯叶。洊震云初。某幸服邇僚。歡聆渥典。欽竚介圭之謁。益昭綿賤之遐。抃慶所叢。文陳罔喻。

回資政李侍郎

見聚珍本卷五十六

回晏樞密

奉被制俞。冠司機省。露騰需奏。確布謙懷。留渙冊以淹辰。企羣情而戢抃。果聆溫詔。終屈攜情。三接便蕃。趣俟斯猷之告。萬樞凝遠。式繫同底之和。欽覲寵華。方深慶豫。若辱書辭之祝。仰銜德柄之勤。慙感茲并。敷陳罔既。

回韓侍郎

東鈞舊德。維枳輔邦。嚮緣共治之宜。遂倚于宣之重。下車未幾。班詔式勤。浹嘉頌之歡流。藹太和而煬攝。猥託芳翰。敷衍謙懷。欽言雋之永長。服潤波之霑洽。載惟感緒。姑戢煩悵。披晤方賒。瞻斬參極。

回程左丞

見聚珍本卷五十六

回夏太尉謝男授提刑

治應最條。寵加使節。士論欽歎。臺札布聞。惟雋路之翰飛。本親庭之愛教。克家用裕。襲謹不衰。方欽駢牡之華。兼覲良箕之盛。猥紆緒翰。周述謙懷。窺覲喻之有條。弟昭銘而無數。自餘景嚮。曷罄名言。

渭州王密學

被褒制檢。帖職機廷。聿獎成勞。寢華近綴。易藩宣之劇部。藉方略於中權。愴我大威。被于戎落。方欣信賞。猥示芳銜。欽倚辨之在辰。枉敷辭而敘感。弟銜謙意。永誌深悰。

夏宣徽

榮奉制恩。進聯徽省。恭惟慶慰。伏以某官大猷體遠。盛業謨明。以文武是憲之資。更安危所注之重。叛羌阻命。謀師倚成。籌制前坐。式遏西略。屬邦嚴薄伐。帝錄久勞。申擇禁廷之嚴。往增使府之重。戎軒務劇。聊疇南仲之勤。胡落數殫。企露營平之捷。王綰誕布。朝韞胥歡。某早庇末光。欽聆茂渥。忝署付行之請。阻伸慶謁之儀。距躍于茲。名言曷罄。

李太傅惠先令公碑文

圖昭先烈。仰達奏封。詔大手以舒文。咨健毫而潤石。義均峴首。名煥京阡。裝搦至精。布傳彌廣。偕沁波而不腐。慶貂葉以滋華。謂接曩游。亦詒副本。申復披文之妙。周知濟美之勤。感戢所叢。名言罔喻。

回轉運龐待制謝轉官

職勞有狀。滿歲當遷。眞拜郎闈。卽褒使府。允穆紳綏之論。踵增簪橐之華。況自陝奧區。雄邊列戍。令糧大廣。擊穀尙勤。諒茲進等之階。聊啓懋功之漸。遽煩敦喻。益見多儀。銜挹所深。銘藏曷已。

# 景文宋公集卷第一百十九

啟狀

體量雜端

右某啓。伏承祇飭飛輶。已臨北道。少留使節。參整事經。方炎旻陽雨之交。且行府文書之總。雖煩省閱。無爽宣調。百吏望風。斯人翹首。願安道粹。仰對宸咨。竚獲瞻陪。尤深欣企。

賀曾參政

光膺制命。進貳台司。伏惟慶慰。伏以某官識照幾神。體含彥聖。所立不倚。我思無邪。早勸講於金華。晚代言於玉署。思式方夏。實尹王京。懲涵化源。裁定民極。久儲上帝之寶。果躋三事之榮。百工傳聞。一□□嘆。神介于福。固正直之是歸。君庸作歌。信明良之胥契。竚光熙綽。遂正上公。某方剖州符。阻從賓序。乃情叢拊。臨翰難文。

回王太傅謝高陽關部署見聚珍本卷五十五

回李舍人謝知制誥見聚珍本卷五十三

代胥舍人謝啓見聚珍本卷五十五

代鄭公謝叅政狀

祇荷褒綸。擢陪台席。亟露陳於讓奏。枉垂報於敦言。趣拜寵靈。交深榮腆。切念某本緣儒服。驟旅朝綏。寢持從橐之華。架蹈禁門之複。蔑齋最狀。少報上仁。方虞且微之詞。復忝敷求之錫。諫曹茂秩。政弼崇聯。雖薄訴以冒聞。猥批章而蒙諭。寵非其次。將忍終身之慙。服不值庸。更畏十人之指。此蓋某官封殖夙加。題評素定。因叩叩之訪逮。亮斷斷之顯憑。助育讀才。贊行賞典。敢不益操深志。仰叩大猷。載驅駑緩之姿。或禦負乘之寇。冀紓誚議。少答恩勤。感灼叅懷。名言罔叙。

回宗室使相賀叅政狀

肅膺褒制。升贊宰司。祇荷寵靈。交深感腆。切念某謏材曲學。慙慮煩襟。興于悴族之餘。玷乃殊科之選。荐塵榮次。取愧英游。幸遭山藪之藏。弗責斗箕之實。獲紓罪戾。寢易歲華。不謂台序乏員。宸私誤獎。諫曹上列。政弼崇聯。尋昧死以自陳。冀回恩而改擇。曲煩聖喻。終廢危悚。已冒服於官成。方震慙於心術。敢圖宗哲。先枉書辭。絢禮意之謀勤。助邦猷之食錫。庶緣外獎。少道多言。佩戢于茲。文陳罔既。

代回宗正狀

叨荷易咨。入聯台采。揆謏材之不稱。淹寵策以自陳。願寢誤恩。少安公議。而詔音垂喻。人乏須承。已冒服於寵章。方慙震於心術。敢圖宗哲。助穆邦猷。列芳牘以鋪芬。借餘光而收飭。庶緣外獎。更激懦衷。榮感叅

懷書言罔叙。

代回皇族狀

近蒙恩制。入服台聯。嘗啓讓以報聞。勉協恭而冒處。慮塵至化。方惕危悚。敢謂宗英。首詒書指。借褒言而煥發。助公論之僉宜。榮感于茲。文陳罔既。

代謝前兩地狀

諫曹上列。宰政崇聯。併荷寵靈。不勝感懼。切念某謏才曲學。忝慮煩襟。與于梓族之餘。玷厥殊科之選。荇塵榮次。取愧英游。書命掖垣。了無裨於國采。傾辭鑾署。始有惕於官箴。幸遭山藪之藏。弗責斗箕之實。獲紓罪戾。寢易歲時。不謂台序乏員。宸心愼舉。首頒成命。猥及孤生。尋昧死以自陳。冀資賢而改擇。曲煩聖諭。終廢危誠。此蓋某官助穆公言。序熙朝綽。因爲容之素定。致延渥以繁臻。然而三事陪榮。萬機佇訪。協承樞極。非庸妄之所堪。參佩韋弦。或箴規之自勉。益圖勤止。用副恩斯。

代謝外任兩制狀

肅膺褒制。外贊宰司。祇荷寵靈。交深感悸。某本緣儒服。浸齒朝纓。頃特從藁之華。架蹈禁門之複。曾無最狀。可報上恩。不謂台序乏員。宸私誤獎。改謫曹之茂秩。躋政弼之崇聯。省已甚明。控朝希免。曲煩聖諭。終廢危悚。尋冒服於官威。徒震慙於心術。曷圖謙槩。前墜慶辭。曲敦征臬之情。陰禦煩言之誚。永惟勗愛。敢

息銘藏。清覲末期。遙懷匪罄。興言感遇。抑假夙期。尙丐良箴。以終前貺。自餘感戢。罔旣文陳。

代回兩地狀

叨聯宰政。尋布感驚。雖趣附於星郵。或未通於鈴史。敢謂某官曲敦夙契。前墜書辭。助恢則哲之猷。陰禦多言之畏。波餘所逮。夕惕差安。屬私抱之已敷。且費詞之難再。姑藏褒激。庸識獎成。

代求見書

見聚珍本卷五十

上潘郢州求見書

見聚珍本卷五十

賈相公生日

宗工挺生。名世胥會。肇休辰於秋律。震佳應於崧神。恭惟某官百志昭明。九德惇大。以經術稽古。用文律緯天。載誕甫期。祝延增跂。射蓬在戶。已符經禮之占。芬菊稱觴。共薦期頤之筆。永輔王室。常冠臣鄰。某遠宿官常。阻陪賓慶。詹祈所萃。崖略罔宣。

留守相公

遠守价藩。坐達材館。洪鈞播物。久依陶育之餘。假節乘鄴。仍在訓齊之末。揆至和之馮厚。擁諸福以便蕃。某官挺世自名。與聖胥會。輸至忠於王室。建不續於宰司。謀謨上前。鼓舞天下。留宮牡鑰。聊均三事之獨賢。備冊贊書。方企九功之圖舊。朱暉順屆。典謁方遙。伏冀上對倚毗。慎調寢饋。



回夏宣徽

祗膺獎冊。出總中權。視傳席之崇階。冠徽庭之茂秩。龍靈優綈。中外僉宜。恭惟某官。精力移忠。壯猷經武。網繆累聖。參幹萬樞。屬者戎候尙虞。簡書徵警。逐羌廬而護塞。移戊校以屯邊。暫輟機臣。往頒師律。自天而下。聊示亞夫之行。先計以聞。式竚營平之奏。眷求惟允。欣賴方深。敢冀哀謙。遽煩占牘。欽啓行之爲盛。願懋賞以斯隆。感慶叢懷。名言罔喻。

回韓侍郎謝加職

茂膺褒命。進貼崇資。伏惟慶慰。恭惟某官。誠本忠純。器包閎遠。參幹機衡之重。荐倚藩垣之行。靜壹政條。妥安民極。上心爲簡。耆範有光。亟升規殿之華。移總使符之劇。河海之波并潤。適寄老成。股肱之郡召還。竚階丞弼。方深舞歎。遽枉緘封。味謙意之冲勞。聳輿情之欽偃。永言欣戢。倍越等夷。

回楊州盛右丞

進肅臺機。外觀藩政。本緣樞宥之劇。重爲拯艾之煩。逮此均勞。允昭同體。武經文緯。聊資作憲之華。袴頌褊歌。抑有報成之舊。詎期鈞念。遐況芳音。敷感會之餘言。寫謙冲之深旨。荐循雅諭。切實勞悰。茂氣方升。寬條適布。願安和粹。仰契眷懷。

賀都尉王樞密

光奉制音。入聯樞禁。伏惟慶慰。恭以某官忠由世濟。寵與時偕。地聯右戚之華。業總中軍之盛。出藩倡治。趨節來朝。屬邊燧之少勤。藉籌帷之中覆。亟僉舊德。參預繁機。自成命之揚廷。藹羣倫而動色。尙聆微奏。固執勞謙。停嘉冊以彌辰。墜芳銜而露悃。矧惟虛席已竚告猷。幸回崇讓之高。時副欽鄰之望。自餘欣感。併此懷銘。

代回晏樞密讓

光膺制命。聯總機廷。伏惟慶慰。恭以某官器采宏通。謀猷隱濟。函天光於泰定。服聖旦於親逢。治被寵靈。偏階華劇。屬以邊書騰警。樞省須才。聿圖舊人。升幹中務。文經武律。參揉庶邦之和。晝訪夕思。佐決萬機之重。敷求惟允。僉論攸歸。敢謂謙沖。特詒誨問。尙稽朝渙。顯露讓函。況成命之已行。諒素懷之無遂。竚聆延拜。併釋歡翹。

代上兩府讓狀

樞帷決采。宸宇僉疇。過聽枵疎。豫參機要。恩靈踰次。震悸裝懷。切念某學術匪優。仕塗茲廕。久塵禁職。獲奉帝暉。姑效螢爝之餘。罔裨金玉之度。驗于已效。奚所取材。不圖咨岳之求。俾貳本兵之重。內循諸已。實疎於多言。上累而邦。敢安於誤寵。伏望某官憫其知止。惠以有終。助推能哲之慈。追罷惟行之命。儻從至讓。是免疾顛。悃幅既叢。文陳奚喻。

代回樞密王太傅

顯奉制恩。正司樞務。伏惟慶慰。恭以某官。烝彝世烈。盟府茂勳。參財坐幄之猷。惠底垂橐之化。四夷來享。賴先計以周知。三接同猷。服嘉謀之開合。成勞灼叙。異數進加。蓋積歲以宜遷。矧師言之率籲。方欽藩獎。遽覩善辭。諒謙槩之有光。願王言之既綽。幸遵眷倚。時荷褒升。欽祝感慙。萃集誠府。

回張副樞讓

見聚珍本卷五十五

回夏宣徽

輟務中機。儻威西畧。抗戎旂而信邁。按邊瑣以申嚴。臨幹不庭。盡護諸將。師興多務。軍次參勞。恭惟夙暮之間。昭介寤興之祉。猥流鈞翰。粉飾謙儀。欽悅禮以敦風。第藏心而戢感。留屯訓武。當宁倚成。行聞月捷之傳。歸總天樞之祕。瞻懷企祝。一二靡宣。



# 景文宋公集卷第一百二十

啟狀

上河東轉運

上都摻別。俄更上下之弦。勞府事叢。罕奉沈浮之訊。承便時而署政。且馳遽以貽書。占授悉周。研覃有味。矧奉將明命。經略奧區。錯上賦以慎財。邦資晉糴。橫大河而縱棹。人記虞巡。諒茲乘傳之行。啓是富民之拜。願遵冲攝。用副眷求。感鏤傾祈。度越倫等。

渭州戴屯田

芬椒服譽。素景於朝髦。談樹宿官。阻申於私見。自辟書之高選。監近輔以陪京。固有隔於等威。矧敢交於記奏。斯者。詎謂倅理郎中。毀方求合。稱物以謙。因門子之賓興。謂胄筵之僚屬。特煩下教。罔愛優評。九河之潤沾餘。頓祛鄙倍。兩喜之言溢美。奚所克堪。願窮緒以珍藏。爲它年之恩紹。秋辰適啓。時訓是遵。遡仙表以在遙。伏空函而奚狀。

河南資政

護將王樞。淹卹祠園。幸及便時。已終藏事。自客轅之暫稅。煩使介之繼來。申遣英僚。就爲供具。膠牽紛屬。

果餌嗣霑嘉賜不停行人改觀雖重本朝之常體亦緣舊物以致懷揆遇匪常撫衿奚報而還衡所迫詣府莫諧擁朝節以亟趨俵台光而茲耿望遵冲衛增乂繁祉早正鴻鈞大庇彙品紳綏之願日月以勞

梁相公

藩侯職冗庸蜀地卑誠有恨於官儀難數通於私問然結戀公府譬萬類之在鈞而布武賓階乏兩朝之飛肉孤懷坐墜芳歲謾遷恭以大觀文相公學士道含至和德包咸事光輔丕后茂熙庶工已成輔相之宜遂去功名之地再更巨鎮聊倡四方惟克簡於上心無不在於王室願總諸福普尉羣瞻矧舊物之未捐荷所天之全覆其爲禱係自萬故常

代回樞密王太傅

需奏報聞詔音敦勸已揆惟良之旦式光往踐之規善舉在茲僉言允穆伏況某官謀經王體武訓師和著愼將之威名擁康侯之蕃錫內簽宥命時叙繁機未滿歲以爲真本稽賞典惟其人而後備式寵臣鄰榮誨首詒謙誠增慙顧寵靈而伊始積欣感以何言

江南轉運郎中

久伏民廩近還閩籍多難幽憂之後學殖淺荒平時英俊之游書牋殆廢載懷高誼實耿離悵轉運郎中望秀材林業偕賢運亟樹風於官次洽飪聽於聰謀久資郎署之賢外駕使軺之傳千艘銜尾大集於中

邦。二節追錄。行階於上。笏嶢嶢歲晏。壹鬱人遐。願履常休。用紓遙款。

知郡國博見聚珍本  
卷五十三

### 魏府太傅

夙以下材。久浮詔祿。嚮福基之甚庳。滯郎署而罔遷。頃以綿章。上庠使蔭。困簿書之猥。幾真殿科。稟符檄之規。偶逃敗事。訖于終課。復此還臺。免三考之去幽。有二天而戴賜。恭惟知府太傅。道孚亮采。聲揉列邦。均陝伯之東西。闡儀克壯。裂星街之南北。戎索是疆。暫倚重於偃藩。佇入膺於夢賚。羣倫注聽。介福大來。顧拱著以方初。邈邈風而增欬。神馳在遠。思札罔宣。

### 薛叅政生日持禮

三階布象。下儲名世之賢。六矢在門。事記炳靈之旦。恭惟叅政侍郎。順杏是采。罔伏斯謀。負敲鼎以和梅。坐巖廊而厚棟。歲周慶育。月叶清和。共延祝於壽祺。益進階於皇揆。有少微禮。其列別封。

### 陳州胡侍郎問候

淮陽近輔。素倚於吏師。河曲餘波。久蒙於京室。迷仰褰帷之化。善移值翮之風。節宣有宜。戢穀云嚮。崢九重之圖舊。參四近以宣猷。拊晤未間。傾瞻何極。

### 攀達侍郎狀

克涓令日。夙艤行臚。順楚汙以揚舲。曄淮雲而引旆。祖壺係出。朝絨愴違。某比屬縣痾。阻陪餞禮。銜恩惟舊。銷志無從。願安遵渚之行。彌保慎齋之訓。永惟愧戀。罔及文陳。

代鄭公回夏尙書

見聚珍本卷五十二

回狀元監丞

比自苦蓋投艱。郊屨鏖蹟。絕聞代事。荐易歲筭。祥紀汔終。迷魂來復。早者亦承狀元監丞大孝。奄鍾偏罰。歸伏倚廬。內抑摧哀。顧服調養。某適當病力。罔及聞知。洎得行路之傳。已嘗踰月之外。匍匐莫展。慙震何言。月初。秀才范君過訪蓬華。伏蒙特墜矜誨。曲亮疴殘。始罄述於孝思。終惻發而收齒。溝中木在。詎稱於繁文。河上病同。但均於哀歎。永言心照。足厚民風。切聆鑄燧在勤。羞膳無爽。順變爲大。惟疾其憂。千萬支持。以副深祝。

太尉

近聞私憂甫寧。病體久去外朝之著。罕脩執訊之儀。跡係民廩。神馳義府。恭惟太尉績宣金石。忠貫天淵。總離衛以誰何。訓善經而肅給。百祥助順。彌厚於福基。三接蕃恩。永隆於邦翰。孤平無似。挺鑄攸依。

座主侍郎書

見聚珍本卷五十

代與李舍人書

見聚珍本卷五十



上許州呂相公書

見樂珍本卷五嗣  
松許康詩之前

代張問謝解

玷斯士之髦。宜從人廢。署茂材之等。輒以名聞。撫才表以自驚。刻情涯而罔竄。竊以斂材之重。歷代尤難。漢則令計吏而常偕。優其續食。唐則具鄉飲而申送。侑以少牢。一再之適。賁有差。造秀之序。升咸允。若夫王在之邑。天下爲樞。本英雄之所躋。視郡國而爲首。乙公車之牘。動或三千。盛橋門之觀。居然萬計。國家丕承聖職。善述先猷。炳乎人文。重我王國。乃至慎咨朝彥。謹司馬之辨材。臨敕貢條。俾新書而從事。必先所試。冀得其真。或內舉之致嫌。許別頭而練實。洪惟典制。高出古先。諒匪行比師儒。譽推鄉曲。敏以求於方策。遂際天人。默而好於深沈。周知統畧。則何以言詩後素。用賦升堂。一縱一橫。折理而歸於正。勿井勿猥。射策而著于篇中。誠矩以不私。膺錫朋而爲盛。若某者。稟生疏闇。累世羈平。幼陶郁郁之風。進服青青之佩。杏花菖葉。早去先疇。鐵檣韋編。顓懷典學。曩緣方物之選。獲參鄉老之書。再試宗司。率見呵於非是。覆求佔畢。徒貽謂於諱窮。加以多難間纏。病悵無賴。罷歸故里。頗同馮衍之掃關。循陟南陔。姑奉詩人之潔膳。奚其爲政。是亦素心。頃聆深詔於四方。內迫偏親之一懼。臨博而企。未能忘懷。再鼓必衰。猶期決勝。是用齋函鄉郵。連襪國游。會執事之避親。當至公之第可。毫錐若綴。銀紵如雲。仰異試之謹嚴。苦措辭之澁訥。逮終削柿。遽迫銜山。已忘之步。與行自知將歸。既債之軍。語勇曷足論功。方峽報聞。卽謀藏密。敢言

斷斷之技。亦偕濟濟之英。擢自下流。致之上列。伏況瞿圖僅存之士。莫匪雅材。中興第二之流。綽存清議。遠茲忝冒。愈集震慙。此蓋某官贊鼓斯文。朱丹至治。樂嘉魚之與共。劬乃進賢。軫函人之恐傷。茲焉藏疾。因三物賓興之際。恢四科進擢之規。水鑑之妍醜洞分。鐵灰之低昂無舛。遂令庸懦。亦齒題評。敢不景止前脩。務時往載。九變貫而知選。梁邇本元。一飛鳴而及辰。寢偕寥廓。庶伸尺寸。上答獎成。

安撫雜端

暫違省闕。臨撫邊鄣。持節戒嚴。駐車問俗。導下情之壅鬱。宣上意之丁寧。易嘆爲歡。化勞而抃。顧屬韃之列帥。方負弩以趨風。欣企所叢。名言罔喻。

回并代部署孟都使

見聚珍本卷五十二

賀廣信軍武六宅

寵正使名。茂光戎幟。守符未改。邊瑣增雄。某官英槩自高。沈謀克際。敵上所愾。鬪勇於餘。積閱有歲月之淹。薦賢交章奏之密。果從聖東。進服恩襲。列帥慰以相歡。中軍倚而增重。攝符無狀。卽席是資。竊抃餘音。回符久禱。

回提刑

光膺茂渥。貳案祥刑。差命便時。卽親治職。某官守兼文武。識照幾微。雖從上食之優。式結帝宸之顧。大河

而北。庶獄號繁。允光命擇之嚴。自寄澄清之本。得人爲盛。先令有孚。惟此屬州。克依餘庇。載言欣躍。曷罄文陳。

判府尙書啓

表海報成。坐躋樂國。申折分理。進守留京。幕府旣開。彼都何幸。恭惟尙書明謨熙綽。俊德惇元。荐幹機樞。彌奮忠力。而自均國勞任。煬天至和。靈龜在忠。喻馬忘累。雖復勉班春而振乏。大庇物於屢豐。出乃緒餘。同人憂樂。賞圖尤異。聊襲冕以露華。地直鬱葱。果錫□□□□。惟泰宇之先定。非外物之屢遷。今茲偃滯。原本下佚。



# 景文宋公集卷第一百二十一

啟狀

上晏太尉

見聚珍本卷五十四

回臺直李屯田

見聚珍本卷五十五

提刑轉運制置到任

近祇詔檢已署藩條參省恩榮舉增慙仄伏念某福基庠下心術慙煩曩以丁辰無勞而冒祿頃因多病未老而逢衰雖忝皂衣之聯久露左魚之請天衷開可朝議雖差及此守邦居同藏疾然甫訟外牒猥值劇州國府遞更本爲都之一會農商雜處率放利於三游處以拙艱慮于墮黜所賴化條明備使範布聞振以宏綱攝其漏目漸冀循良之勉罔煩鐫讓之科企竦於茲名言罕旣

壽州到任謝兩地

見聚珍本卷五十五

兩制

近祇恩檢已署郡條澄俗匪能循榮集悻伏念某器非適用材不瘳人筋力之強早爲病奪緹油所學遂與年侵荷漢橐以無裨乞阮塵而自試嚮緣蒙可獲此庇身曾是劇藩號爲難治銅鹽轉餉歲溢於商縉

薪粲論輸日交於吏案。楚僖俗錯符攝務煩。內惟泥遠之姿。必震隱官之咎。所賴至公當路。明詔在寬。密盧鍾之異宜。俾韋弦而參企。漸圖有政。庶服攸箴。擁符檠於一方。隔紳綏之三揖。永言系戀。恨以翰飛。

回李團練二首

見聚珍本卷五十五

陳州楊相公

紆壽春之組。次宛丘之郊。緣材閣之末行。擁原簪之舊感。卽趨府上。獲侍台光。聞郤縠之談。彌臻義府。規方叔之政。交樹壯猷。乃知右輔之安。式有長城之寄。且復睿存羈齒。崇比上賓。拜嘉授粲以不遑。始至如歸之絕擬。萬夫歆艷。一介光榮。迫此簡書之期。遂悵風波之阻。乃情知嚮。曷日敢忘。矧以虛從藁之聯。守左符之遠。孤根易仆。墜雨可矜。惟祈卓馬之亟還。入冠乾樞而作輔。大坏兼造。孱蹟攸依。叢禱于中。訥言安喻。

回綦撥發

見聚珍本卷五十五

回廬州張學士

棲毫從藁。引絳近藩。本緣藏疾之仁。靡課班春之效。獲茲臥閣。居惡空餐。方企風華。願修鄰好。敢謂某官追書林之舊。欣牙壤之交。疾走行郵。辱垂芳問。故情雅眷。甫依東壁之餘。美政歡謠。益仗南風之競。褒存所至。銘款忘勞。時籥向衰。官箴有限。望安介福。庸副遐心。

常州知大卿見聚珍本卷五十五

郢州知郡比部

各領州符。同達陸戟。我疆差近。君御少留。復緣庭鯉之歡。頗熟星鳥之采。終然共治。俄爾遂行。限北渚以銷魂。恨南雲之礙目。潛商驛候。當啓齋鈴。惟敏政之有初。諒蕃祺之交勞。江關歲晏。金玉人遐。結戀孔多。陳言茲拙。

回泗州知州見聚珍本卷五十六

與轉運兵部

光奉寵詔。外總行臺。除目四騰。公言參允。恭惟某官含章暢美。游聖殆幾。自結清衷。早諧華仕。垂紳綬袂。久已竄行。觸脾投觚。舉皆游刃。嚮緣四牡之選。式撫三吳之疆。民克用和。使還有指。未溫魯席。遽飭漢輶。掩三淮之右區。趣萬倉之西漕。轡無停攬。遂經登汰之謀。貨有餘貲。並調盈虛之筭。先聲云泊。羣望自歸。某早締雅游。今叨屬部。敢恃私於恩舊。方稟誨於化條。欽偃歡愉。叢并心極。

回廬州張學士

治壤聯疆。行書交舍。雖嘗修單訊。而比辱報辭。屈尊府之稜威。厚雅游之褒眷。永言隣睦。有激世風。某官素槩冲猷。懿謀嘉話。樹聲藩服。流美臺閭。求福不回。雖軫潛郎之嘆。保身且哲。迺臻大雅之宜。今比燕居。

諒蕃戢穀。竚帝暉之接晝。慶耆範之光朝。瓜溜所分。蓬扶云託。瞻懷之素。崖略匪宜。

回張著作

久塵侍寮。懇乞州魚。得請中宸。爲邦善地。宿苦筋骸之疹。頓蒙稍廩之豐。藏疾于茲。銘恩何極。敢謂某官愛忘其鄙。褒溢于言。因奮藻之患多。遂扶衰而引重。欽膺交照。輒用中藏。或挽或推。迥敦於風節。將安將樂。有激於頽陵。官次坐糜。獨言胥阻。勉圖良食。無重返心。

上集賢相公

阻侍台華。稍淹時管。列邦地冗。罔敢通書。羈齒心危。未嘗寧舍。本和鈞之曲賜。及藏疾之寬科。貸以所窮。詭其收報。離縫跼翻。諒無彈射之虞。荏苒孤根。或動勾萌之望。然念朴愚云舊。樹立匪它。明有自知。越思葢鮮。士無不肖。免嫉良難。追悞昨非。幾成夕惕。淮壖繁洪。楚俗剽輕。雖勉頽條。未知寡悔。所賴博陽在位。適陰德以方週。宣父爲師。主斯文而未弃。踵門雖遠。馳悃知歸。

韓資政

嚮緣多病。懇乞爲邦。制許一麾。事皆三府。會尸祿之譏。寢暴且得。請之文具存。因獲左符。猥叨劇地。蚩氓輕剽。囂孽叢紛。摧櫓之心甚危。渠能操決。轉粟之蹤未定。居長平鑄。邇敵台藩。闕脩訊舍。迄茲少息。始用追慙。重念早以屏輜。厚蒙比數。巖廊脫屣。嘗趨內魏之風。儒館援毫。竊記吁俞之論。今茲列壤。均浹餘波。



何圖舊物之微。重荷所天之覆。永惟瞻賴。拙布言詞。驟及歲陰。諒安時祉。益遵調護。上副營求。

### 回昭譚知府司勳

頓首中宸。乞廕閑郡。上仁兼愛。微欲見從。留籍雲意之華。俾守州來之劇。下車班詔。案籍觀風。乃知雅官之游。因占僑鄉之貫。每欽臺彥。輒試里居。敢謂某官。顧星署之聯。灑月臺之訊。褒謙過分。道舊兼常。窮側里以敷辭。訂疏麻而凝馥。永惟銜寫。曷寄聲言。矧萬里之名沙。本一都之作會。已聆異等。間竚褒章。齋疾慎持。禱懷參劇。

### 回廬州慎龍圖

偃息大藩。妥綏善俗。化行已日。福集有基。謁歡袴於斯人。潤靈河於比壤。方茲景行。將列感懷。敢圖宣布之閑。曲示諄勤之誨。多文博我。早欣冊府之聯。徼福事君。今竚簡書之卹。佩音有裕。敷禱奚殫。尙苦歛炎。顧持齋疾。

### 回亳州韓資政

嚮奉單國。獲通盛府。羈懷薄訴。訥語無華。緣大庇之有初。非報章之宜及。敢圖鈞抱。尙眷鯁儒。謂左竹之隣。禮均胥命。且洪河之浸。福有并蒙。屈此雄嚴。裁爲訊教。曲達久轉。驟回陽管之春。跼羽重蘇。併解虛弓之怯。永銜存撫。還竚埏和。

柳轉運

就膺恩檢。移領行臺。署事有初。移文交告。徧屬城而竦震。謫公路以欣愉。恭惟某官擢穎士林。揚芬世烈。早速吏課。飪服朝猷。峨豸中臺之端。危言已屢。潛郎華省之舍。見效旣彰。淹久外遷。便蕃劇選。然而長淮夾右。故楚參聯。利總南方之強。漕爲天下之最。尙煩按節。聊駐褰帷。方論煩使之勞。入對清光之邇。某曩披令采。今庇餘光。企詠瞻依。益倍常等。

回制置林郎中

改領外臺。總經南漕。東求至遯。調度寔繁。騰制目以四馳。浹公言而同允。側聆行府。將出屬藩。追郎舍之締游。接朝綏而最舊。負簡清道。幸識騶呼之華。執板造庭。方稟教條之謹。敢期謙損。先墜滕封。推禮意於降階。損使威之異等。捧窺窮幅。腆駭叢衿。顧邇望於末光。冀面敷於感緒。自餘欣躍。曷寄言聲。

回陳州楊相公

仰企台躔。密瞻義府。緣參承於下執。時通列於單函。位隔等威。禮無報復。某官弗矜元輔。厚禮諸生。特遵宜答之常。俾作焉依之地。富鄰華燭。均蔀屋之餘輝。喧律熙春。動枯株之生意。永言銜款。罔及喻名。三輔與雄。四隣欽眷。竊祈順攝。用介蕃釐。孤冗之情。懇勤茲切。

回曾學士

召試複門。升華書殿。郎音騰示。士類欽歡。恭惟某官。凝肖天倪。叢芳世烈。弗從舊食。自策俊科。允矣丁辰。久而埋照。盤桓歲晏。飮詠菁莪之風。偃蹇郎潛。終耻鑲耶之請。嚮由庠胄。參講藩房。緣碣館之上游。趣蘭臺之賜禮。揆辭有蔚。第賦尤高。亟蒙武帳之嗟。遂直東廊之奧。一辭進對。叩漆屐之焜煌。三祓直居。盛太官之供擬。聿爲彰俊。方比頌賢。遽辱圓封。鋪陳亨會。甚文且敏。初無加點之煩。將樂而安。更揖相先之懿。符魚官冗。刀筆務嬰。欣腆交中。文詩拙喻。

上兩地

見聚珍本  
卷五十四



# 景文宋公集卷第一百二十二

啟狀

回呂學士

茂膺褒檢。進拜華曹。詔目傳頒。公言欣允。國家丕承列聖。大集祕書。積爲丘山。未判朱紫。金匱幽藏之舊。羽陵紛蠹之餘。帙第舛并。題名放失。嚮頒臺禮。申委時髦。悉探九流。彙分四部。羣條參列。積歲覃思。標明七略之凡。整比百家之猥。欽惟俊選。備罄誠明。紬績有勞。擁牙籤而窮景。討論既具。煥芸牒以蒸青。迄此奏篇。果聆第賞。改員省署。被獎王綰。企商賁之允諧。方頌賢而交慶。遽詒啓幅。敷敍榮期。三復滴華。但仰斯言之選。一函修報。莫知吾黨之裁。姑戢眷私。永敦風誼。乃情歡嚮。萬一靡宣。

回府判魯端公

尸祿蒙訶。請藩自試。許兼邇職。俾屏劇州。荷山藪之見容。專刀筆而爲效。歷懷籀俊。罔敢通書。誠以列郡中臺。居有重輕之別。寒灰秋蔕。決非氣焰之求。何迺哲人。迴敦至獎。輟贊譚之餘景。絢點翰之彝儀。支梧頽波。尉安危蹟。迷魂黯黯。頓如招些之還。未路俚俚。更仰餘之及。載言銜竦。拙布端倪。

回王大卿

祗屏劇州。迢遙治閣。拙汗書筠之訊。長懷卿月之華。緹籥更時。甫田均帳。此者。敢圖耆哲。遐貺絨膝。一介奉將。八行周喻。仍聞易地。將及交符。來暮去思。容切二邦之仰。道冲神勞。固叢百福之宜。胥歎異疆。奚階接履。尙希良食。式對亨期。附遺布懷。牽文寡述。

回廣德比部

懷章之戍。弭轍過州。特緣郎省之同。得奉賓綦之接。主儀不腆。水宿難淹。耿此騷離。惋爲惓企。不圖雅眷。迺篤深情。中道剡緘。因風流問。譚詠椒蘭之馥。併紓蕭葛之忠。尙審便時。方趨治所。益強攝衛。垂副瞻言。

回亳州韓郎中

見案珍本  
卷五十四

回呂贊善

開榮恩檢。通守奧藩。惟京輔之宣風。重吏師之畫諾。選能斯在。視政云初。顧惟不腆之邦。胥慶有鄰之辛。萬馳思緒。遽枉芳音。荷永好之芳椒。動忭悰之悅栢。第銘禮況。曷罄言聲。

回廬州張學士

亭瓜聯軫。旆駟銜羈。每欽治等之高。兼切隣光之庇。心焉景行。日以飛馳。敢圖仙室之惇儒。參顧邦麾之病守。書筠灑妙。齋釀分甘。第三復以忘勞。實九回而紓悒。春達茂暢。神祉紛那。善治寢居。仰符眷擢。

上楊太尉

見案珍本  
卷五十四

回廬州慎龍圖

捨舟弊邑。馳傳樂郊。冒涉初炎。保寧玉體。顧我邦之密邇。繫師節之糾提。特辱詒書。聿崇修睦。坐磨符邱。阻屬豪韃。尙聆追薦之勤。望勉加餐之愛。瞻懷感服。滅裂匪宣。

回穎州鮑學士

改藩近輔。便道弊州。屬玉體未寧。犀舟延進。道山之舊。殊阻於銜杯。地主之儀。靡皇於出宿。方茲慙恨。邊枉音滕。承便嘉時。已總仁政。首念鄰睦。遠走使人。且喻勿藥之和。彌釋采蕭之戀。恭惟清穎奇士。儒林文人。還定流庸。簡略苛細。報成可待。覺五月之猶賒。均潤有餘。況九里之非遠。載惟瞻庇。竊用翹忻。愼夏持生。乃情深祝。

回提刑李都官

光膺朝東。欽按刑章。總三淮之列邦。擁一封之飛傳。茂涓令日。騰署使移。屬守瞻風。吏股皆拚。敢圖提振之重。尙記平曩之游。前墜滕封。曲敦獎眷。釋尋于再。銘厯相參。矧以承平之辰。詳讞尤重。覈爰書之設。謬糾庶獄之叢。紛威節所臨。善氣交應。自顧疋殘之質。冒居藩劇之州。政也無良。智有不逮。始託二天之庇。苟逃三黜之幽。傾僮前驅。想見頎表。乃情欣向。間不容言。

回知南京俞給事

見聚珍本卷五十五

上新轉運張郎中

見聚珍本  
卷五十四

回廬州愼龍圖

欽咨日御。肅展藩儀。啓大府之雄嚴。副南公之歡踴。泰然樂職。式是爲邦。曾坐席之未溫。遽占書而垂喻。報成五月。佇觀齊魯之能。修睦四鄰。前服陽秋之懿。疆分有守。踵見無從。姑服眷私。內銘膺府。益持齋疾。以副情翹。

回李中允

抱疾蚤衰。乞州自效。向雖開允。乃值劇煩。簿最囂敦。簡書填謗。分爲俗狀。絕睨英塵。某官以傑出之才。膺試可之召。旦程奏牘。暮直道山。耿賢路之光華。竦仕塗之歆豔。發舒感遇。騰播牋移。已施臺省之英。兼顧藩翰之允。鼓詞華鬱。約禮渠勤。顧推一飯之先。優借百函之貺。重惟退墮。久去凝嚴。三費蒙嘔。已忘討論之舊。九言知選。姑降紉繹之精。欽祝翰飛。益據盛業。餘光所臬。吾黨焉依。感竦欣銜。滅裂非敘。

上僕射相公

光膺朝制。兼總天樞。伏惟慶慰。竊以三公之尊。古無不統。五代多故。職乃有歸。別咨邇臣。以本兵柄。部分諸將。直出於禁中。參決奇兵。不關於公府。承流寢失。革弊在權。惟時宗工。克對明命。某官世基厚德。天界大猷。熙載之勞。則歌於六府三事。寵任之美。則詩於崧高烝民。協濟聖功。丕冠皇極。然德有垂儆。運無常



安遼種寒盟。羌酋盜塞。保障四鄙。未使窮追。調發千金。不無煩費。上意尤注。時柄難分。果屈上公。臨判中務。擇清明之便日。布焜煌之冊書。百辟歡聞。多方抃愜。方且坐料脆敵。陰伐詭謀。案邊吏之鎖甚精。轉關中之漕相繼。漢皇萬里。決無不見之明。曲逆六奇。遂倚先幾之勝。奮庸有待。訂美無倫。某適綰州章。方遙謁舍。詔文布下。私慶叢衿。

上樞密相公

光膺制命。兼秩台司。伏惟慶慰。恭以某官與學幾神。孤風拂世。便蕃懋寵。密勿洪機。介多福以不回。藹昌言而無擇。自西氛締惡。列戍雄邊。六月出師之勞。千金調食之急。守皆餘力。民罔咎辭。暴於外朝。實我不績。屬并公府之領。遂視宰司之崇。朱閣傳趨。墨麻誕告。疇庸所奮。示筌宰之一心。付任有歸。注安危之兩意。詔文申下。士議并歡。某夙齒陶挺。側聞贊授。魚書有恨。鳧藻無從。卑情不任。

上集賢相公

欽膺茂冊。兼領鴻樞。伏惟慶慰。竊以台宰所司。文武參憲。號無不統。烏得有分。況二臺宿師。三接論道。幃幄制勝。樽俎折衝。果出吁俞。併茲眷委。伏惟某官至誠天挺。清節世咨。輔政六年。均邦一體。大猷懿德。暴中外以徧知。確懇冲言。讓功名而已屢。終不得謝。倚而代工。復涓外日之良。合總中機之密。除音四達。歡議交騰。方將變伐詭謀。增修王度。足兵謹備。靖西土之釋騷。按節撫和。取匈奴之要領。民瞻叢仰。丕績佇

升某祇佩左符。阻陪慶謁。誕鎔所泊。距躍兼常。

陳州到任謝兩地

見聚珍本卷五十六

回潁州鮑學士

汴漕之藩。假塗通謁。講鄰邦之好。厚修地主之儀。宴豆屬厭。行囊捆載。不皇淹久。遽愴騷離。前及便時。已署州事。重以晨雞夜犬。近接於餘音。富燭貧光。再依於雅貺。積爲感賴。可旣名言。嚴律向深。寬修多裕。願加頤實。參介福基。

到任上兩制

見聚珍本卷五十四

回通判韓中允

上文南闕。奉對西清。擢次甲科。顯通閭序。代家鄉俊。參詔於朝。猷仕牒思陪。例關於郡刺。詔除行下。公議歡嗟。緣感會以敷陳。徧儒先而厚謝。眷惟孤蹟。見謂曩游。嘗枉音滕。茂將彝禮。會夏秋病力。牽屬思遲。文難倩人。書乖宜答。久悵慙於開筆。俄遷次而易藩。首念峻寮。將聆畫諾。巾車未稅。行李已來。載窺累幅之華。益服占辭之敏。承侍家府。尚須戍期。調奉燕安。福祿榮衍。惟長人之庸儒。忝近輔之奧謁。兩翼紛蓬。一心摧櫓。日祈夙駕。垂諗善經。欽企感藏。鹵莽非敘。

上程左丞

比膺成命。入守近藩。願表蒙榮。悸餘集抃。伏念某性疎乏媚。材拙少施。早誤朝咨。偶塵法從。稟生多病。移狀亟言。間緣蜚語之興。遂獲出麾之便。而淮肥郡劇。獄務事叢。日困鞅轡。坐需諉譴。天謗私望。詔俾內遷。還江海之遐身。訂丘山之大賜。然結根萑苻。已嘗一枝之危。而引吭嗜嗜。敢有再鳴之伺。危心漸釋。鈞庇有基。此蓋某官景式彝倫。邁種陰德。激波迎涸。穿隙逗輝。尙令羈蹇之人。復寘安安之地。敢忘頌祝。還奉耆明。伏謁未辰。吮毫奚敏。

上許州孫龍圖

解符下蔡。換節宛丘。便道無口。卽官云恪。祇循思任。併集榮慙。伏念某學匪逮優。情而近介。向叨法從。亟避親嫌。多病自陳。言皆有狀。不材遭詆。上頗見哀。顧淮楚之劇州。假圭魚之寵刺。甫更年舍。方經殿科。遽煩綠詔之追。入屏黃圖之邇。跼波而奮。儼焰重燃。天實誘衷。人得支壞。此蓋某官念膏僚之舊。傾先否之期。協導僉疇。采收羈債。伏況前瞻邵父。具有教條。北面齊侯。又依鄰庇。叢茲多幸。免恤後艱。修謁尙賒。抒辭奚狀。

回延州通判馬太傅

見聚珍本  
卷五十三

回陳書記

見聚珍本  
卷五十五

回杭州通判劉都官

阻奉雅游。漫躡華歲。符魚有守。風馬非鄰。私書闕修。悵暄茲極。敢圖茂眷。迥篤久要。粲一紙之丁寧。見千里之眉目。神麻非匹。右袂永藏。清覲未辰。至和增攝。

回亳州韓資政

六枳聯藩。三能在望。頃嘗奏記。俄沐報章。冒櫟烝膏。然灰發燎。鬱爲叢感。方冀嗣緘。不謂某官坐閣之餘。隱几流問。敷陳毅幅。疾走齋兵。下致雌黃之堂。垂賁支離之翰。湔埃濯鱗。可質於褒言。弃壇頑金。終依於巨冶。敢論比壤。自是所天。願遵頤食之宜。參副維巖之禱。況于羈冗。尤切翹依。

上宣徽王太尉

見聚珍本  
卷五十四

# 景文宋公集卷第一百二十三

啟狀

回壽州張侍中

見聚珍本卷五十五

上兩地謝赴闕

見聚珍本卷五十五

上蔡州夏太尉

見聚珍本卷五十四

梓州杜學士

自領州魚阻參朝祿。緹灰凋歲。風馬殊疆。徒延脰於緒音。闕修儀於尺訊。敢圖英哲。申記故常。謂五日之趨。每陪於指帶。且一麾之出。偕幸於班春。但良晤之莫諧。實遙懷之均恨。況聞報政。將逮交符。埽還左城之參。益重西清之眷。載循感企。萬不一宣。

上昭文呂相公

專總萬樞。靡奮沖用。間緣疾作。久以告居。高手係馳。清衷存喻。別詔薰場之啓。參迓繁禧。切勅黃門之嚴。不通讓奏。邇臣旅候。大事走咨。洪惟本朝。可謂殊禮。相公方且懇辭柄任。將就養頤。遁其成功。屆我不社。然斯人善祝。宜無愧辭。內天棄和。康不須日。況宜尼吾禱之久。博陽陰德之遐。所苦至微。向憚不已。望速

臻於勝念。姑勉奉於謨謀。早視政機。垂快羣願。永冠三槐之路。均延二老之齡。某外滯守廳。阻參冢宰。載惟至悃。拙布多文。

上京東運使陳司勳

見聚珍本卷五十三

上壽州張侍郎

見聚珍本卷五十六

回李太傅惠御製挽詞石刻

見聚珍本卷五十四

上永興太尉

見聚珍本卷五十四

上知府諫議

官伏攸箴。地賒惟屏。每懷耆德之懿。闊治私書之勤。內耿勞悰。漫躡芳歲。恭惟某官遠猷時並。清節世咨。輟自凝嚴。總臨都奧。茂經民紀。偃息所以藩君。勤喻上恩。宣布由乎樂職。人和歸美。天祿固膺。矧乃史企。惇言朝思。雋老第恐進絳之駉。召還規地之華。願保寤興。適符瞻嚮。

回夏太尉

見聚珍本卷五十四

同前

輟務天臺。懋恩將闕。裂京榮之近壤。來建中軍。總關隴之上游。別開盛府。恭聆善旦。參布寬條。甫光注賴之殊。允契休嘉之集。蠶茲裔種。孤我朝恩。雖上德包荒。議貸先零之罪。而善經防患。聊咨細柳之屯。佇即

敍於戎疆。永折衝於廟筭。嘉庸所底。休運來同。某早荷品題。今遙趨伏。敢期台造。先枉教音。均察父之慈憐。重孤生之感槩。庶緣舊物。終託洪鈞。銜篆之叢。名言罔既。

上呂相公

修觀王朝。政麾侯服。聳槐庭之舊德。人慶具瞻。殿星昴之全封。地均夾輔。遽飭元戎之御。間開尊府之儀。振導天聲。威懷斗俗。逮此春祺之洽。允同邦體之休。然以四嶽炳靈。世叢茂伐。三階疑象。神奇昌符。雖道韻之益冲。顧化鈞之焉往。諒茲息偃。行復彌綸。某早服辭垣。久塵賓閣。玷齒牙之餘論。訂松栢之晚凋。尙緣禁直之勤。或草剛辰之贊。茲焉素祝。無喻丹懇。

上夏太尉

見案珍本  
卷五十四

上呂相公

稱嬖元戎。肅開大府。便時樹政。爲國偃藩。竦列辟之具瞻。宜百祥之順報。將躋台采。兼臨南北之街。周化邵風。更並東西之陝。願符丕眷。保御至和。益光蒙福之餘。還乂熙庸之載。某蹟廩官守。心寄門闌。濯濯戎韃。莫陪於左屬。濛濛零雨。企詠於東歸。祈嚮所叢。文陳非既。

上西洛宋資政

茂將中詔。出總留符。趣周道以少勤。冒陬春之餘凜。便時府上。宜美化條。綿深息以內充。堪繁祺而昭介。

矧茲奧洛。實號離都。蘭錡誰何。素謹千門之衛。杏陵充奉。類多三選之繁。居守所咨。倚成尤重。願答維嚴之望。益孚瞻闕之祥。某早服恩徽。坐搖心極。限省闈之常局。隔藩枳之餘陰。靳懇叢并。索言安止。

上呂相公

易地假藩。乘圭肆覲。冠華儀於星落。慰羣望於槐朝。錫馬畫蕃。分麾夕引。便剛辰而襲吉。卽大府以宣風。冲氣內馮。繁釐順嚮。恭惟某官。謀合國蔡。績藹天旂。翊嬀后之萬機。叶商衡之德保。茲攜槩遁。我成功終。迫咨兪。再倡屏翰。胡街漢瑱。竝繫鎮御之方。鉉路師壇。參照寵光之盛。方均瞻賴。忽枉封。因感會之餘言。借褒存之曲禮。敢緣至意。益獎愚衷。願追零雨之歌。還復洪鈞之賜。藏心有素。擗翰匪宣。

益州轉運明學士

使輅西撫。載耿離騷。書舍右傳。首煩辭誨。布諄勤於言味。寫棗覆於清條。隱几孰窺。題衿滋感。惟岷都之地沃。本漢斧之任雄。流馬轉財。舉調盈虛之節。明縉下諭。允追宣布之風。增御太和。上符至眷。盍簪未日。擗翰奚云。

回轉運

遑遑明晤。遁歇歲芳。顧支離抱疚之餘。加澁訥措辭之短。怠馮參訊。尤結情勞。恭惟黃圖夾右之區。赤藩刺舉之重。澄清所寄。自均八使之雄。調度攸資。居足千金之仰。仰聆最目。方冠吏師。欽佇追鋒之還。進侍



承明之祕。秋煒蕭布。毛澤順成。善膺福祿之蕃。式尉騷牢之素。

上呂相公

待罪禁局。攝官選部。才隨用乏。日與勤俱。遜瞻坐府之尊。頗僇奏記之禮。永惟僚戀。徒戢精微。恭以某官道格明良。感孚樞極。暢經謀於宰路。申著蕭規。挹高讓於邦風。再光周屏。蹈中和而弗跲。脆戢穀以攸宜。惟是寶封。均於潤福。介圭來覲。固無信次之勞。嵩石具瞻。且有僉同之舊。但虞息偃。難廢延登。冬律戒寒。歲芳凋節。益儲茂猷。入對昌期。上刺未從。臨風增企。

錢大監見聚珍本卷五十三

上魏府任諫議

通籍中臺。歸風北道。歲無我與。坐慨於逾陰。庇有君餘。弗忘於歸賴。嚮者。敢謂某官。茂將禮意。流錫書音。因子舍之于行。訪郎闈而墜睨。褒評引重。迥同月旦之更。幽處增輝。頓若陽秋之暴。願銘膺府。庸誌恩憐。欽聞趨節之還。前啓在銘之賜。望符眷屬。慎齋粹和。

回外任賀冬

天晷迎長。歲儀參亞。候魯氛於十耀。冠周曆於三微。恭惟某官。業擅儒先。喻高師采。露誠明而撫仕。樹風績以宣方。陽序昭臨。靈釐臻嚮。寧圖謙槩。先示慶辭。敢緣垂祝之褒。還奉俾臧之壽。永言欣應。叢鏤丹衷。

回通判學士

英游云闊。年所薦華。屬間歲以病多。苦臨文而思拙。闕於辭遠。寢以慢成。終仰景山之高。均嘆甫田之遠。茲者。敢謂某官。寄通有素。道舊實勤。因鈴史之奏都。隱几囊而占問。愛褒參極。孰復忘劬。盛觴久之。寢識蒲俎之味。冒霜近止。決無松鬣之凋。冀佩玉音。昭銘蓬曲。右文在旦。顙俊爲先。永念譽髦。首膺臬器。願駉然於生養。副須矣於朋簪。欽祝所并。選言非述。

回知郡主客

見聚珍本卷五十三

回邠州夏館使

見聚珍本卷五十三

代人謝改京官

祗膺褒擢。伏積震追。竊念某系出單平。才惟常短。自褫巾於嘉會。繼訟牒於大邦。家難中嬰。氣機久耗。嚮屬羣舒之境。慎圖樞著之豐。偶玷舉知。往專左職。月凡歲要。顧商筭之有條。州攝臺符。幸地求之如律。攸司言狀。保牘中程。不圖啓擬之辰。超預制除之目。況書簽佐局。省戶隸名。雖改宿官之常。要是開榮之序。靜言優獎。仰本先容。此蓋某官助訢養材。因雲霈潤。念僂僂之昧。久因迷津。俾種種之衰。漸希來譽。得肩髦父。進冒寵私。敢忘士節之甘。庸累汝評之愛。

回曹琮太尉

見聚珍本卷五十四

回陳泊殿院謝官

被獎恩書聯榮憲案。珥華簪於朝右。式登周行。操白簡於殿中。尤資汲直。矧辱嘗僚之舊。素欽展體之賢。會此甄囊。方深抃愜。收圖謙尚。特枉文陳。露明好於私悰。屈臺威於公範。英辭有未。勞府知銘。餘俟踵門。更期敷枉。

上徐州扈諫議

伏蒲展覲。剖竹求藩。輟君雷之敷言。緣使符之樂職。下車有謐。已日其孚。徧和氣於東人。浹餘波於上國。坐堂乘暇。憑几止辭。眷宮雉之宿官。附客魚而流問。仰銜謙槩。申佩言章。願符愷悌之謠。增舍神明之祉。吏師是式。惇簡埒光。趨伏未期。文陳叵逮。

賀冬

寶典迎長。歡儀亞歲。本軒箏而鳳應。參漢曆以珠聯。某官六德映辰。九言貫道。紀丕庸於王府。憲嘉靖於友邦。望與日升。福偕時億。願契朋陽之復。早瞻裨袞之歸。訓有宿官。禮賒薦慶。欣祈所嚮。一二罔宣。

回外任郎官

見聚珍本  
卷五十五



# 景文宋公集卷第一百二十四

啟狀

上青州相公

材任四隣。勳包九序。由先朝之感會。佐下武之續承。和江鼎以既平。坐左槐而實相。胡公練達。貫萬事於中庸。陳平變和。成四夷之鎮撫。曩者長君信黜。真廟顧成。巨厯竊權。羣邪間覺。締惡氛而貫日。煽僞象於滔天。某官接鼻翼以鸞翔。截河流而濟貫。發於至榮。則金石爲開。厭其未萌。則匕著自失。或投畀豺虎。或暴以秋陽。援白日而再中。遏尾閭之將泄。暨湯而有一德。式契尹躬。爲堯而去四凶。逐光虞典。永言忠壯。蓋絕等夷。間復內樞之臣。蜚語爲變。託此城社。構爲鯨鯢。駭機潛張。異議放肆。某官躡足定計。膝席建言。殲封豕之怒牙。羸狼羊之藩角。脅從罔治。反側之子自安。開陳其端。震電之刑爲措。袁安之府。不忍錮人。邠吉之庭。未嘗按吏。坐清亂象。迎召太和。至於擇典以震國容。納誨以輔君德。二精陽燎。再侍上帝之郊。三適造庭。兩較羣髦之譽。百穀長懋。三光仰澄。邊境無忿驚之師。海隅躋仁壽之域。故以垂光南簡。傳信後昆。若乃正色端朝。詳言處事。不吐不茹。梃羣動於始騷。有猷有爲。鍵多門之敗政。作帝元輔。爲天孝侯。並昭著於本朝。匪妄宣於曲筆。一昨上穹見戒。靖館挺災。本託寓於何言。啟側身之至德。某官繫國休戚。

爲時慘舒。亟引咎以自陳。願避賢而塞責。遜誠確守。惟辟重違。聊罷機衡。用均勞逸。進退之際。下蔑聞言。榮悴所交。上無二色。全齊巨鎮。維梓先疇。有多口以名鄉。實高陽之署里。揮金而娛逸老。釀酒以見故人。當代之榮。自我奚讓。竊詳前代。非無鉅公。蓋齷齪者遺。諒於具員。容容者本。圖於邀福。徒耽謝罪。良昧於知幾。惶懼可憐。亦顛於臨壑。徐防坐災而切免。石慶視事於安歸。功名難全。希曠如此。寧若某官奮格天之業。避其成功。罄靖國之謀。訖無纖隙。履重剛而不貽。訂大蔡而前知。冠乎三階。順經躔於軒老。不答十策。全大體於漢庭。終始弗渝。古今絕擬。伏望益儲道妙。進荷春祺。遁几几之碩膚。暢冥冥於何慕。安石同樂。既踐治城之言。赤松與游。遂抗留侯之志。俾儒夫之有立。何祇悔之可虞。某早託鈞陶。阻陪車乘。瑞圭出國。曾賦崧高之八章。參桂非珍。猶是藥籠之一物。佩台憐而有素。書感臆以無慙。

回外任賀正

歲舍履端。春塗肇始。滿椒花而爲壽。振金鐸以宣和。恭惟某官雅量淵澄。清機穎發。居洽朝綏之譽。出揚使隰之華。適啓康年。載蕃休祉。謙惊有裕。慶問見存。愧佩所係。兼陳奚悉。

回余舍人謝知制誥

見聚珍本卷五十三

回京西呂轉運

榮膺中詔。出總外臺。伏惟歡慰。恭以漢有刺部之權。唐專輸漕之職。合爲使任。必簡朝言。惟儒苑之峻髦。

擁郎曹之清望。歷茲繁寄。正謂觀能。況關輔上腴。提封甚遠。賦租錯出。轉積無留。竚緣朱輓之還。行被青  
藩之召。方將刻牘。遽荷流音。感頌交深。底裏奚究。

柳侍讀

見聚珍本  
卷五十三

回并州明龍圖謝改諫議

見聚珍本  
卷五十四

上陳州張相公攀違

得請宸旒。出藩京輔。卽乾台之大任。領齋鉞之中權。以恩均勞。便日趨治。乘安流而順汭。昌炎序之方隆。  
善御粹冲。式符瞻賴。某阻陪行帟。罔訴離矜。愧戀所并。文陳無喻。

回成德軍魯侍制謝上

違交戟之嚴。擁左符之寄。便時署政。已日乃孚。眷師壁之所屯。控邊關之尤極。暫煩臥治。欽覲報成。何卽  
席以未安。已占辭而流問。圖書對峙。比陳接武之游。膠漆投堅。姑荷同心之契。欣慙駢集。款鏤奚忘。

回潞州郭觀察謝上

見聚珍本  
卷五十四

回河東柳按察

見聚珍本  
卷五十四

上外任兩府賀正

曆謹三朝。邦熙百禮。舜職舉授時之典。周官和佐治之常。伏惟某官。碩望冠時。忠規映國。暫均勞於樞鼎。

方夾輔於藩維。願乘歲祚之蕃。還變階符之重。某早銜恩紀。甫限官箴。睽尊府以馳誠。阻歎觴之介壽。永言瞻頌。拙喻端倪。

代回夏相公

被命漢廷。于宣并部。抗戎旂而信邁。按邊瑣以申嚴。坐府有初。占書猥及。方修謝懇。遽覲殊恩。台符帥節之華。共當注意。留鑰太阿之重。彌賴同寅。誕告以還。僉言惟允。矧茲舊物。夙在洪鈞。已欽夾輔之隆。冀趣還朝之寵。尙期暮節。獲覩元功。傾祝于斯。一二非述。

回彭王二舍人謝知制誥

見案珍本  
卷五十三

代回彭舍人

近審光奉恩章。進升禁職。伏惟歡慶。竊以乾文彪列。上憲於掖垣。王命慎思。下嚴於簡冊。卓爲盛選。要值難才。恭惟某官。旦暮亨期。珪璋令問。書林軸簡。早欽宿業之勤。仕路牽絲。久鬱潛郎之望。向還使節。入侍螭坳。適茲籲俊之辰。宜被非常之寵。遂諮僉美。分掌命書。方且丹青聖文。鼓舞王化。視淮南之詔。固本於純深。奮東皇之辭。一歸乎灝噩。自茲器任。叵測冥升。詎意衰殘。尙繫存記。推之謙柄。況以長賡。姑謹銘藏。罔殫文述。

代回王舍人



向審恩章。進陞辭省。慶儀未展。私忤已深。恭以某官早智夙成。清徽獨映。本遵辰而發策。久効智以牽絲。敦詩無邪。蹈道難進。縹囊細簡。恣閱書林之嚴。夷玉河圖。自是皇居之寶。果膺試札。入服禁垣。易染蓂之珍袍。署判花之曩式。方且帝猷以之粉澤。贊命以之純深。雲漢天章。金相玉振。士焉爲盛。增四戶之凝嚴。文果在茲。進三王之灝噩。擢材之美。悅栢所均。嚴緊明哲之懷。尙顧衰殘之質。飛文見貺。約禮彌勤。願謹銘藏。永隆風契。

上知郡比部

祗守王官。質更天吏。寓辭雙鯉。罕逢遠客之歸。睇采哀烏。邈在太微之後。緝曲蓬於心極。庇嘉樹之培封。頃以慈寧誤恩。經筵承乏。無勞報國。有祿浮人。收可棄之臆脰。玷惟塗之丹腹。夙宵內忖。志限已踰。敢謂某官挺操。徂□□褒魯袞。占英辭而潛發。敕行李以奉將。祗誦選言。載求深旨。喜不及寢。表善教於師門。恩與其□。成育才於詩教。恨遙趨伏。祈保寤興。北首孔懷。中乾罔敘。

上寇給事復官

茂膺明制。式敍華資。伏惟慶慰。恭以某官識際幾神。謀經信采。光華茲邁。力命允偕。宣三德以有家。暢四支而含美。頃自倂圖懷決。俾又墊昏。屹巨防以新謀。擧長筴而底績。清衷攸簡。慶賁遂行。屬神燎之冠雲。包中區而洒澤。日咨上綴。式是近藩。首申綠詔之溫詞。復引黃闈之舊物。不失正於進退。愈見履基。樂相

說於君臣更符邦□方均悅栢傾竚追鋒

代到任謝兩地

龍箴祕曹魯瞻善部併塵東寄增腆情顏竊念某一介拘儒三朝誤寵盡忠無補所食皆浮緣舊齒以見收玷講筵之叅勸春秋暮止內識於蘊非筋力茶然頻煩於漢告間露乞身之奏冀諧歸老之求當宁示慈秉鈞爲地廢其始願寵以崇資進喉舌之官聯領股肱之使寄寶金充裕因許其過家賜車在庭更慙於稽古此蓋某官全有邦之大體假前席之餘言務穆彝倫罔捐故老伏況左符所治先壤連疇單車就行中宿而至家爲儒里無煩崔篆之班春日稟餐錢足佐廉頗之強飯因茲善養漸及退歸罔謹中外之言實賴挺陶之賜過茲而往未識所圖

回趙舍人

告勞星掖將命州麾當出祖於河梁阻敍違於刺字緬惟共治已協宣和某官才裕氣純志恬履潔靡真懷於出處方樂職於東南引郡紱以爲榮雖從已欲坐棠陰而決訟行及政成甫此歛炎諒加頤護禱虔瞻切無喻悃誠

回外任賀諫議

見聚珍本  
卷五十三

# 景文宋公集卷第一百二十五

啟狀

謝大名王相公

光膺帝制，兼秩台司。聯茂公槐，叶維邦枳。斯民之望，允尉於巖巖。上帝之心，方咨於采采。亟聆還賞，務欲敦風。然而襲卜其依，明縉素定。熊羆崇讓，雖形吁異之言。箕尾垂精，終應營求之寶。拜嘉在旦，有位相歡。何辱撫冲，曲貽誨翰。荷坯陶而最舊，篆肝膈以無忘。

鎮府謝諸官相賀啓

近自閑州，俾臨劇部。既護諸將，并提六州。載循懦怯之人，不稱藩宣之寄。軍中頭白，固已自慙。馬上脾消，若何爲報。敢期英峻，馳錫題函。以鼇署之深沉，嘗更法從。雖鴈門之踦遠，猶借褒言。嘉惠載隆，勞膺永戢。官常有次，盍簪未期。時億美祥，日躋榮寵。

狀元學士

屯蹇所鍾，支離無幾。比緣家難，自屏氓屨。託于密之藏，榮塗兩絕。懼薦瘥之困，生意日銷。兀罔辨於昭瞶，嗒如忘於吾我。城闕之事，都罔聞知。竿牘所交，裁施嫺黨。寧無英茂之眷，固有蘄嚮之心。奈何區霧殘骸，

零丁末路。伏苦忼景。霜露交摧。榻管臨文。馬烏迭舛。雖勉塵於記室。或致悞於空函。貽誚士倫。曷磨言玷。此者。恭承狀元大著學士。肅膺召節。升直書林。敷試藻以第篇。掩諸公而出右。內舒感會。旁占題函。率隆禮之龔規。述尙賢之盛遇。本施貴近。罔及疋癰。何言泛梗之微。辱墜乃金之間。園封引發。五內震慙。伏況斷斷諸材。藥藥危息。卿曹舊屬。隔品朝闈。學序懷官。絕窺仙室。仍茲削跡。乃是廢人。已隔賀驚。重紆訊幅。諒以竹林賢巷。併牒而開榮。遂俾星壁辰髦。降階而伸禮。仰銜愛借。徒誓珍藏。必若獲終升穀之期。再與芬蘭之益。緩詆訶於贖髮。結庇賴於叢雲。納之下陳。斯爲素蘊。幽襲甫爾。崖略匪宜。

代外任賀入兩地

比塵台勢。尋布感惊。雖趣附於星郵。或未通於鈴史。敢圖恩映。前墜書辭。助恢則哲之猷。爲禦多言之侮。波餘所逮。夕惕差安。屬私抱之已敷。且費詞之難再。姑藏襃激。庸謝獎成。

回賀改待制

近沐宸恩。入充禁職。寵緣時集。愧與榮參。猥瞻雲構之崇。驟識天光之邇。重循至幸。甫畏曠僚。敢期益著之游。前致勤斯之問。推先仕路。孚協朝言。第啣悅栢之情。茲締曲蓬之感。自餘欽誦。罔旣敷宣。

呂相公攀遠

肅趨命節。還冠乾台。戒執馭以駛馳。副刻書之進拜。炎暉甫盛。行道少勤。惟帝寶之夙符。擁民瞻之介祉。

芳槐樹左。竝存蕭相之規。零雨東來。皆慰周人之望。竚脩觀贊。仰副宸俞。某祇守官箴。阻伸廷禮。永言欣愧。參集悃悃。

授待制謝兩府

見聚珍本卷五十六

### 回賀改待制

近蒙褒命。進服禁聯。祇荷寵榮。交深腴懼。竊念某志雖典學。資適逢辰。拱著治朝。竄名祕館。專記言於右史。仍參擢於縣官。淺智有涯。畏汲深而乏綆。長年多病。賴藏疾以如山。詎意清衷。垂收冗質。因憐孤拙之效。特升華近之班。拂豹省之清塵。旋參法從。企鳳阿之層構。寢造仙游。內揆憲庸。慮與缺望。敢謂某官樂聞朝渙。助穆邦猷。紛鋪題謗之辭。外禦浮囂之議。餘光所逮。危懼差安。永惟謙柄之勞。但戢心蓬之感。

### 外任兩地賀正

王朔履新。國章和布。湛椒霞而集慶。踞罇虎以陳儀。恭惟某官功映臣鄰。德含天粹。入告有猷之盛。間宣爲憲之宜。茂氣至臻。允繫於夾輔。明神攸勞。彌介於善祥。昭叶壽祺。還膺亮采。某式勤官守。阻望台華。欣祝內并。題名罔喻。

### 回盛右丞

近憑小紙。冒列思悰。計行舍以未遙。枉詒書之垂問。永惟恩紀。伏誦誨言。噢咻褒存。一出少原之舊。支離

黯系參慰東山之懷承福履之茂綏副官師之勦嚮併茲欣服罔喻名言春筦寢餘夏□茲啓願縣存於道味永光弼於王塗趨伏未展瞻馳偕極

梅侍讀問候

見聚珍本卷五十三

回江郎中

睽風茲久參訊良疎近緣子舍之行厚枉書筠之間意兼辭篤感與愧并欽惟靈澍之封慎擇潛郎之俊歲成訢報宸獎惟蕃願遵明晦之宜交集康寧之祉竝游末日結想何言

回王龍圖

肅奉褒恩已仲慶禮竊惟奎文交綯雲構肇營胥宇中天之嚴參侔冊府訪逮西清之奧益召俊僚譽選耆髦茂光禁直恭惟某官含章文苑潔矩仕塗本難進以處躬介不回而取福縣官食給荇彰煩使之能省署輟過茲軫潛郎之歎請問論事造辟蒙知果因疇俊之辰昭式類能之舉進偕嚴助諒無侍臺之勞榮過東丘親見出圖之盛方深舞詠猥閱函封忘淹恤之爲嗟樂嚮儒而抒感餘言垂逮冲意彌惇戢勞府以永藏搖厲曆而曷敘

賀大名王相公

見聚珍本卷五十二

賀安撫夏太尉

易建高牙。總臨西服。簡緣皇揆。美浹朝言。恭以某官爵竝天人。才兼文武。不回不貽。則克保於身。有猷有爲。則用又厥辟。發自至慮。奮爲嘉庸。六府勸而可歌。九鼎隱而增重。比緣醜虜。未卽靈誅。敢謀風塵。輕動疆場。亟經煩武。荐及扞城。大兵久屯。諸將難一。洪惟睿筭。思革舊章。特包全陝之區。悉受中軍之節。入居都會。參建屬僚。一切從宜。百全制勝。陳平盡護。漢后倚而差強。充國旣行。罕羌聞而自潰。不建殘虐。指景成擒。某夙佩鈞憐。欣聞邁東。從軍甚樂。已隔後車之行。作誦美勤。願附清風之末。瞻顯詠抃。併萃乃誠。

賀資政侍郎

肅奉褒恩。榮兼祕職。序進春官之亞。移撫价藩之雄。龍集朝僉。誼諧公論。恭惟某官器亟道甫。識貫民彝。裁總萬樞。懋經一德。屬告勞於基命。聊倡化於大邦。未幾班條。亟聞異等。果茲叢渥。爰示簡心。華幄宣溫之嚴。斗宮喉舌之貳。黃圖啓輔。紫縣聯圻。諒緣景福之蒙。滋趣贊書之拜。求言慶悃。曷喻費詞。

盛右丞問候

見聚珍本  
卷五十六

回澶州王相公

跡局禁聯。地遙材館。每懷恩紀之舊。罕通記幅之私。怒焉乃心。歲聿云暮。恭惟某官天挺懿德。邦咨大猷。暫輟樞機。總臨都會。眷茲北道。台輔所以具瞻。沔彼大河。京邑由乎蒙福。諒緣倚注。克保休嘉。益光維屏之勳。還奉疇庸之訪。此爲祈嚮。罔喻文陳。

回楊舍人

見聚珍本卷五十六

謝兩地兩制問候

稟氣素弱。爲客寒所乘。薄於腠膚。伏在床枕。藉輜交選。區霧不分。謹湯劑以迭攻。啜淖糜而自救。浹此旬日。粗獲瘳興。伏蒙某官屢墜誨言。并降親筆。惻其羸瘼。勗以護將。荷陰德之敷施。撫危軀而三百。伏況朝符行下。假式甚優。曲成便養之私。厚作尪殘之地。迷魂初復。耗力未完。須任□右之趨。迺罄翹材之謝。愧悚感緒。萬靡一宣。

代回呂舍人

見聚珍本卷五十六

回偕舍人

寵膺制綽。入直書垣。偕賀者以踵門。獲稽如而內謁。丁辰逢吉。扞吾黨之寵嘉。以聖得賢。愜至公之頌歎。矧參曩照。胥接邇班。覲瑞羽以上搏。躍春蠡而中極。敢圖沖尚。專徇彝儀。謂揚糝以居先。紆墜書而厚謝。詞條披秀。墨藪騰芬。駭炙輶之不窮。竊循衿而有述。且西臺祕地。東里俊僚。言成世謨。意如上出。筆端暫下。則震若風雷。文彩一騰。則倬爲雲漢。諒匪薄三古之汾襲。貫萬物之本元。美充於中。行飭於外。譔注之勞。已積。疇咨之命。惟行。乃今值才。誠爲妙選。徧聆羣議。誰不爲然。尙敷感遇之繁。蓋本勞謙之懿。永惟銘戢。拙寫端倪。



回呂舍人

見聚珍本卷五十六

鄭州王相公問候

見聚珍本卷五十四

河陽夏侍中

見聚珍本卷五十五

代鄭公回樞密侍郎

祇膺敦勸。入對寵靈。廢克讓之素懷。總惟幾之祕務。蒼明茲賴。中外相歡。恭惟某官。節貫滄溟。業昭久大。褒參宰旅。惟阿衡之致君。間嗇道冲。專仲尼之慎疾。太和保御。介福叢滋。師錫于帝。而不謀。圖任惟入。而最舊。冠躋樞禁。敷闡內猷。綱紀所歸。下式瞻於風采。老成來復。國方寄於典刑。辱況書辭。增銜謙柄。慶右賢之有始。矧咨長以焉依。抃悚參并。文陳罔及。

代鄭公回張侍中

光膺帝制。出冠侯藩。伏惟慶慰。恭以某官。道格允元。業宣寅亮。綢繆二后。師長百僚。封誓著於河山。至誠開於金石。入專樞近。備罄謨明。阿尹之勤勞王家。庭堅之邁種民德。功成釐積。禮重均勞。果倡牧於多方。爰就封於近甸。方符僉論。忽枉書辭。承敦牢讓之風。尙鬱疇庸之典。冀遵朝旨。時奉寵靈。欽祝感藏。併萃清府。



宋景文公詩文典雅而奧博。剗削而峻拔。北宋諸公中別自成家。論者或謂好爲艱澀奇險。未必然。本集或稱百卷。或稱百五十卷。蓋集非一種。而各本今皆亡。近時聞清國亦從大典中採掇。釐成六十二卷。知其非完篇也。余偶獲宋槧零本。稱百五十卷者。所憾僅僅數卷。不過觀本集原式。第以宋人舊帙存世甚罕。今印出以實叢書函中。文化七年庚午陽月二十二日。天瀑山人識。



叢書集成初編

景文集 一二冊

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一





